

Tusi 3

Tausaga 9



Gagana Sāmoa

Gagana Sāmoa

Tausaga 9 Tusi Tolu



MĀLŌ O SĀMOA
MATĀGALUEGA O Ā'OGA TA'ALOGA MA AGANU'U

Agaga Fa'amālō

E momoli atu le fa'amālō a le Matagaluega i tusitala mo manulauti, onosa'i ma galulue fa'atasi mo le tu'ufa'atasiga o lenei tusi tāua.

Suafa o tusitala:

Elaine Ufagafā Lameta

Agafili Tuitolova'a

Fa'atonu o Tusitusiga:

Agafili Tuitolova'a

Designed, edited and typeset by Egan-Reid Ltd, Auckland, as part of the Sāmoa Secondary Education Curriculum and Resources Project for:

© Government of Sāmoa Ministry of Education, Sports and Culture, 2002.

Reprinted 2004 with minor amendments.

Funded by the New Zealand Agency for International Development,
Nga Hoe Tuputupu-mai-tawhiti.

Printed through Egan-Reid Ltd.

Managing Contractor: Auckland UniServices Limited.

ISBN 982-517-025-5

ANOTUSI

Āutalaga 1: Aganu'u ma agaifanua	5
Āutalaga 2: Tapu'eina o tomai i ala fa'asalalau	38
Āutalaga 3: Sa'ili'iliga	53

Āutalaga 1: AGANU'U MA AGAIFANUA

ĀLĀFUA MA FA'ANAUNAU GA IA 'AUSIA

Ālāfua

Fa'anaunau ga ia 'Ausia

E tatau ona mafai e tamaiti ona:

AGANU'U MA
AGAIFANUA

Iloilo ma faatulaga le gagana o fa'aaogāina ia talafeagai ma 'autū, tagata o iai ma faiga o leo.

Fa'alogo i ni fa'amatalaga tu'usa'o ma fa'avasega vaega 'ese'ese o le 'āiga, ma ō latou fāiā.

Fa'alogo i tala o le 'āiga, nu'u, ma le itumālō ma ia iloa fa'asino i le fa'afanua.

Fa'aaogā fa'alagiga o matai, faifeau m.f. ma le 'au'āiga i faatinoga o galuega i totonu o le 'āiga ft. vala'au e talisua, fa'afeiloa'i, tali atu i ni fa'afesili.

Faitau fa'asāmoa mea taumafa ft. i'a, talo, ulu.

Fa'amatala fāiā o le 'au'āiga ma le matai.

Faatinu tu ma aga e tatau i le va fealoa'i ma tagata ft. tu, nofo, tautala.

1. Aganu'u

O aga faavae ia o le faasāmoa e tutusa ai nuu uma. O ia aga masani e maua i Savaii, Upolu, Apolima ma Manono. E maua foi i Tutuila ma Manu'a.

- O aga o gāsesega, lufilufiga ma taligāsua.
- O aga o faa'ele'eleaga ma velevelega.
- O aga talimālō ma faaaloaloga.
- O aga o faiva i le sami ma le vao.
- O aga o faatufugaga ma faiva alofilima.
- O aga o tapua'iga ma tatalo.
- O aga o fono ma faasalaga.
- O aga o taaloga ma faafiafiaga.
- O aga o ulufalega ma saofa'iga.
- O aga o faafalega ma mulivai.
- O aga o taulāsea ma laulā'au Sāmoa.
- O aga o saofa'i ma maliu.
- O aga o le manino ma le 'ava.
- O aga o faasifoga ma faamāgaloga.

O aganuu a Sāmoa, o ni isi ia o ā tatou measina. E iloa ai le Sāmoa. A taunuu mālō, e fai le 'ava o le feiloa'iga, e:

- sufi le 'ava.
- folafola le 'ava.
- faatau le nuu talimālō.
- lāuga mua.
- faatau le malaga.
- lāuga tali.
- tufa le 'ava.
- tautū le 'ava.
- moto le 'ava.
- fai le fono o le 'ava.

O le aganuu le:

- laulautasi.
- amo'ulu.
- 'aiavā.
- taalolo ma isi.

O lona uiga, o le olaga o le Sāmoa, olo’o iai ma aga faasāmoa e faatino ai, ma so o se sauniga e fai i le auala faasāmoa, e pa’ia ma mamalu, o le aganuu lenā.

2. Agaifanua


O aga ia e patino lava i lea fanua po o lea ‘ele’ele. O le faataitaiga, o le aganuu talimālō o le ‘aiavā. E tutusa nuu uma i le upu po o le aganuu, ‘aiavā ae eseese faatinoga i mea e fai ai. O le eseesea lea, e mafua mai i le agaifanua. Afai o le ‘aiavā e tatala, o lona uiga o oloa Sāmoa ma oloa palagi (faleoloa) ua taga. Afai o le ‘aiavā na’o oloa Sāmoa, e sa oloa palagi. E tutusa aganuu ae eseese agaifanua e faatino ai.

E pei fo’i o le laulautasi. O isi nuu o la latou lava agaifanua i laulautasi, na’o le tamai puua po o le laui’a, a o isi nuu e taga le pisupo pauna, pe ā leai se laui’a, po o se moa, ae sa le pisupo 12 aunese, e sa foi se eleni. O agaifanua uma, e lē tutusa ma e mafua mai i pa’ia ma mamalu e faatitino i ai le fai mea lelei ma le fai mea mafai. E faaeaea tamalii ma faamamalu lāuga a tulatoa ma faleupolu.

3. Tu ma aga

O aganu’u ma agaifanua, ua fausia mai ai Tu ma Aga a le Sāmoa, e ola ai i aso uma.

E ao i Sāmoa uma, ona malamalama, auā e iloa le Sāmoa i ana Tu ma Aga. O Tu ma Aga foi, e fuatia ai oe. E mafai ai ona faavasega tagata. E maua ai “tamāli’i ma tufanua” ma o le faavae lena o le Tulafono Pulea.



O aga faaaloalo foi a le Sāmoa, e maua ai:

- agālofa, agalelei.
- aga faatamalii.
- aga faatausala.
- aga tusaafia.
- agamalū.

O nei aga e lauiloa ai le Sāmoa. O lana amio solia ma aga tauagafau, e a’o i ai amio ma faaolaolaina le mau, “O tama a tagata e fafaga i upu ma tala.”

O Tu ia ma Aga, e tua i ai le limavaivai ma le fia’ai i aso ta’itasi.


- ‘Ā ‘ē mativa ma fia maua se lālaga o sou faalavelave, “alu le toma’aga.”
- A leaga lou ma’umaga ua fia maua se meamata, “Alu le asamoga.”
- A lē lava la outou meaaano aemaise lava le po, “Alu le ‘ai’aigaga.”

O aga faaaloalo ma lau gagana faaaloalo, e mafuti ai mea faapelepele. O lau faamolemole ma lau faafetai, e tupu ai le gauilofa. E te alu ae toe valaau atu, “A iai se mea e mana’o ai, toe sau.”

O aga a tagata matutua ua alofaina, e aupito taugata lana faafetai ma lana faamanuia.

Vaega 1

‘Āiga Sāmoa



O le matai o le faauluuluga o le ‘āiga Sāmoa. O tagata e i lalo o lana va’aiga, e tā’ua o lona ‘au’āiga. E aofia ai ona uso, tuafafine, ta’ito’alua ma ā latou fanau, po o sulī o ē na muamua atu. O ni isi foi ‘au’āiga, e nonofo ai tagata o ‘āiga o faiāvā ma nofotane. E nonofo ai foi isi tagata e lē tau i le suafa matai o le ‘āiga lea, ae ua nonofo ai ona o ni isi mafua’aga; po o ni faigāuō, po o ni tagata foi na agaleagaina e o latou aiga moni, a ua ave le ‘āiga lea ma sulufa’iga. Ua nonofo ai, ola ai, tautua ai, ma matai ai. O le tele foi o ‘au’āiga Sāmoa olo’o iai ma fanau fai.

Fa’atinoga 1


Fa’amanino le ‘Āiga Sāmoa

1. Galulue ta’ito’afā.
2. Vaevae manino le faamatalaga o i luga i se ata ma faaigoa pe faamatala ia faigofie ona malamalama le vasega. Ia faamanino itū nei:
 - matai.
 - tagata moni o le ‘āiga.
 - tamafai.
 - faiāvā ma nofotane.
 - tagata’ese.
3. Lipoti auaua’i vaega i le vasega.

Fa'atinoga 2

Talanoaga

1. Galulue faatasi ae nonofo vaega.
2. Faatusatusa la outou ata ma le ata lea; talanoa ma faasa'osa'o la outou ata.




Fa'atinoga 3


Taupulega ma Filifiliga

1. Galulue ta'ito'aono pe faaaogā pea vaega sa galulue ai.
2. O ata olo'o i lalo e maua mai i le ata o i luga.

■ Taupulega




■ Filifiliga



3. Faamatala manino ata ta'itasi ina ia māioio lelei eseesega o le taupulega ma le filifiliga, e tatau ona tausisia lelei e suli o le 'āiga, e maua ai le nofo fealofani ma le fetausia'i.

Fa'atinoga 4 Fāiā

1. Vaelua le vasega i tama ma teine.
2. Talanoa i le lā'au o le 'āiga o Po ma Ao.
3. Talanoa ma faamatala le eseese o le vaegātama i totonu lava o le 'āiga ma le vaetama mai se 'āiga ese.



Talanoa ma faamaumau tali a le vaega.

1. O le ā le fāiā a Mele ma Kuluva?
2. O le ā le fāiā a Litia ma Asenati?
3. O le ta'u a Luatasi iā Aigaelua?
4. O le ta'u a Kuluva iā Siasosi?
5. E to'afia le fanau moni a Po ma Ao?
6. E to'afia suli tupolo?
7. O ai e faatatau i ai le faaupuga lea:
 - “O le mea uliuli i le mata o le tama, o lona tuafafine?”
 - O le toto, ivi, ma aano. Aiseā?
 - A lafo le faaupuga lea i se tagata, o le ā lona uiga? Aiseā? O ai e aafia ai? “O lona tofi maa ma le i'ofi.”
8. Tusi i lau api, ao i le faiaoga, togi ma faamalamalama.

Fa'atinoga 5 Avanoa Fa'atutumu

1. Avanoa faatutumu.
2. Fili le upu talafeagai e faatumu ai le avanoa. O faamatalaga o fāiā ma sootaga ole'ā fesoasoani tele iā te oe.
 1. O suli tupolata, e faauigaina faapea, o suli _____. O lona uiga, e tino, toto, _____ ma _____.
 2. O le isi igoa o suli tamafai, o _____. E aiā foi i le _____.
 3. O nofotane ma faiāvā, ma tagata uma na auala mai ai, o lo latou tau i le suafa matai olo'o nonofo ai, ola ai, tautua ai, ma i'u ina matai ai, o i latou lava o suli _____.

4. O suli tūpea, o tagata _____. Olo’o nonofo i le ‘āiga ae lē tau i le suafa matai. E lē lavea i le filifiliga ae na’o le _____.
- O la latou uo i aso uma, o le fa’aupuga faasāmoa, “O le ala i le _____ o le _____, faalā’au sautia o le _____.

Vaega 2

Faalagiga

O matai Sāmoa, ua vaevaeina i tamalii ma tulafale. (Fesili i ou matua po o se tagata matua o lo outou ‘āiga, po o lo outou matai, o se tamalii po o se tulafale, ma toe fesili i ai po o le ā lona faalagiga.)

E tofu la le suafa matai ma lona ta’u faaleaganuu e valaau ai, pe faalupe ai, pe faalagi ai. O lona faalagiga tualoa lena, e aloa’ia ai o ia i le faasāmoa, aganuu ma saofaiga. E oo lava i le lotu ma le mālō.

E mafai ona valaau lona suafa pe ‘ā e mana’o e afē mai, pe tu mai, pe faatali mai foi. E tutusa ai la tamalii ma tulafale i le faiga lea. ‘Ā ‘ē fai atu i le matai, faifeau, faiaoga, foma’i ma tagata matututa,

“Ua ‘ē sau?

Ā ‘ē alu i fea?

E te ma’i?

Sau inā ‘ai.”

Fai mai Sāmoa, ola sou lē mafaufau. E te iloa aiseā? O na e sa’o lelei fausaga o faamatalaga fesili, ma faaafe; pau le itū ua faitioina ai, e lē fetau ma le tulaga faaaloalo a le Sāmoa, e eseese ai matai ma taulele’a. E tatau ona faaaogā le gagana faaaloalo.

O le aganuu, afai e savali ane se matai i lumafale a o fai sa outou mea’ai, e tatau ona faaafe, peitai na’o oe le tagata matua olo’o i le fale. E te lē iloa foi po o se alii po o se tulafale. O le upu faaaloalo e faaaogā e faaafe ai le matai e te lē iloa:

“Talaa’ao maia i le meatatauai a le ‘āiga nei.”

“Tala maia ou aao se’i fai se faamalosi-tino . . .”

‘Ā lē’o lenā, ‘ave i ai le upu faaaloalo maualuga “afio mai”. E lelei ona maualuga atu lau faaaloalo nai lo le tulaga o le matai ua ‘ē valaauina “Afio maia i le meatatauai a le ‘āiga nei.” Afai foi ua e usu mai i le a’oga ae lua fetau ma se tagata matua, po o se matai, ae fai atu iā te oe, “ ‘Ā ‘ē usu i le a’oga?”, afai e te lē iloa po o se alii po o se tulafale, e te lē iloa fo’i faalagiga, faaaogā le upu “fofoga”, e tutusa uma ia alii ma tulafale – “O lou fofoga, o le’ā ou alu i le a’oga” po o le “Ou te alu i le a’oga vaeane lou fofoga”.

Fa'atinoga 1

Gagana Fa'aaloalo

Galulue ta'ito'afā.

Talanoa i liliuga talafeagai o faaupuga o i lalo, i le gagana faaaloalo.

Lipoti i le vasega.

Faaupuga:

Ua e sau?

'A 'ē alu i fea?

E te ma'i?

Sau inā 'ai.

'Ese'esega o alii ma tulafale i le gagana.

Upu lautele	Alii	Tulafale
sau	afio mai susū mai talaaao mai	maliu mai sosopo mai talaaao mai
alu	afio atu susu atu talaaao atu	maliu atu sosopo atu talaaao atu
'ai	talisua taumafa taute	tausami taumafa
inu	taumafa taute	taumafa
moe	tōfā	tōfā
ala (sa moe)	maleifua	ala i fanuga lelei
tautala	saunoa tulei tanoa malele	fetalai vagana (E le'ō tulafale uma)
tā'ele	penapena faamālū 'au'au taufā	faamālū 'au'au taufā
va'ai (v)	silasila	maimoa
siva (v)	sausauoa	sausauoa

siva (n)	sausaunoaga	sausaunoaga
oti malieu malaia	tu'umālō	usufono
'oti (laulu)	tutu'ulagi	faafuga
ma'i uagagau	faatafa	gasegase
faalogo	faafofoga	faafofoga
vaai tilotilo	silasila taga'i	maimoa taga'i
'ula	tu'ipapai ■ taupou = tuive'eve'e ■ manaia = tinumasalasala	faasolo
afafine atalii	alo	alo
to'aluā	faletua	tausi
fale	maota	laoa
laufanua	tuāmaota	tuālaoa
usu i mālō	aliitaeao	usualele
tagi	tutulu	tutulu

Toe taga'i i le tusi a'oga Tausaga 9 1995 itulau 19–21.

Fa'atinoga 2

Iloiloga o upu 'autū

usufono	taumafa
tutulu	tutuli
maota	sā'afi'afiga

1. Galulue i vaega e lua.
2. Mate po o lē fea upu e sa'o.
3. Lipoti i le vasega.
4. Sii i lau api.
5. Ao i le faiā'oga.

1. Ua mole lo'u manava auā e le'i taunuu mai se aso o faiā'oga.
O lē fea upu ua ou mana'o ai?
2. E faamatala lana tala faamomoiloto, ae sisina atu ai ma o'u loimata, ona sau lea o le tina o le teine ma fai mai "Avatu le solosolo lea."
O lē fea upu o a'u?
3. Talofa e, ua fai i lagi le folauga a le tu'ua. O lē fea upu o ia?
4. Ua lāgia le afio'aga o 'Āiga. O lē fea upu o a'u?
5. Na'o na ou mafaufau i aso sa ta mafuta ai, i ou foliga lalelei ma lau amio tauagafau a ua leai se mea ou te mafai, ua pule le Atua.
O lē fea upu o a'u?

Fa'atinoga 3

Talanoaga


1. Galulue ta'ito'aono:

- foma'i.
- faiā'oga.
- faife'au.
- faipule.
- matai (tulāfale).
- tamaitiiti ā'oga.

O fa'alagiga masani o tagata nei:

foma'i	-	susuga (i le alii po o le tamaitai foma'i)
faiā'oga	-	susuga
faife'au	-	susuga
faipule	-	afioaga
matai (tulafale)	-	lau tofā

2. Talanoaga: Tutū fa'alapotopoto faapea:-



3. Faasolo le faiga o Fesili: amata mai i le foma'i ae tali lava le tamaitiiti ā'oga.

Foma'i - O fea lou tamā?

Tamaitiiti - Lau Susuga oloo faama'ima'i.

(po o lea foi - Oloo faama'ima'i lo'u tamā lau Susuga).

(po o lea foi - Vaeane lou fofoga oloo fa'ama'ima'i.

Oloo fa'ama'ima'i vaeane lou fofoga.

4. Faasolo Fesili i le Tamaitiiti.

■ E sau afea lou tinā?

■ E mo'i ua leiloa le paopao o lou tamā?

■ O ā mea a ou matua oloo fai?

■ Talofa alii/siaula!

■ O fea le puleaoga?

■ O le ā le taimi o le malologa?

■ O le ā le mea e te tagi ai?

5. Fa'afesaga'i fai paga. Faamanatu i lau paga po o le ā oe.

6. Faata'ita'iga: - "O a'u o le tulafale", ae faapea lau paga, "O a'u o le faifeau". Ia manino le itu lea, auā e aafia tele fa'alagiga i talanoaga.

7. Fesili le isi ae tali le tasi, a uma fesuia'i. Manatua fa'alagiga ma le gagana fa'aaloalo.

Pe 'ā ē alu i fea?

Ft- Faife'au i le tulafale - "Pe 'ā lua maliu i fea?" po o le "Pe 'ā lua sosopo i fea?"

Tulafale - "Vaeane lau susuga, ou te alu i le falema'i" po o,

"Ou te alu i le falema'i vaeane lau susuga." po o,

"E saunoaina e lau susuga i le Faafeagaiga ou te alu i le falema'i."

FESILI: - Ua 'ē sau?

- E te ma'i?

- Ole'ā e alu?

- Pe sau afea le palemia?

- Ta'ua na e lāuga i le usu.

- Sa e tā'ele?

- A lua ō i fea ma lou atali'i?


- A lua usu foi i le galuega?

- Sau ia o lea ua vela le kuka a le fanau.

- Ua a'e lou faiva?

Fa'atinoga 4 'Ese'esega o a'u ma 'oe i le gagana

Afai e te tautala oe faasino ia te oe, fa'aaoga le gagana o aso uma. Afai e te tautala faasino i le isi tagata, fa'aaoga le gagana fa'aaloalo.



1. Vaelua le vasega.
2. Talanoa i faapogaleveleve o i luga.
3. Aiseā e fa'apea ai le gagana?

Vaega 3 Gasesega O Taumafa

O taumafa Sāmoa, e gaosi i meaai Sāmoa ma gasese i le auala fa'asāmoa.

Faiga o le Taufolo Niu

Faafaapusa le umu. A ola lelei loa fafie, ipu ma pulu, ona tunu loa lea o 'ulu. O aveloloa o 'ulu fai taufolo. Fa'i ese 'au o aveloloa matua ma tu'u i luga o le umu, ia faaū i lalo mata po o le pito sa pipii ai le 'au o le fune, ona toe faapulou lea i pulupopo.

O le tagata e tunua 'ulu, e fua lelei le taimi e liuliu ai ne'i mu pe vela mafo'e. O le isi tagata e fufulua le tānoa po o le umete ma saunia le 'autu'i.

A vela loa 'ulu, i'o i tua ma fofō'e, ona tuu auaua'i lea i totonu o le tānoa. Nini pe olo pe faatāele le 'autu'i i le peepee, ona tu'itu'i talatala lea o le 'ulu vela, ae i'o ese le fune ma fatu, ona faato'ā tu'i olo 'o'omi lea se'ia malū ma una'i faaputu i le isi pito o le tānoa, ae se'i faasolo mai i totonu 'ulu vela ua uma ona fofō'e, ma o le faiga lava lena, se'ia lava le taufolo.

Tu'i le ogatotonu o 'ulu malū ma talatala i autafa ma fuafua i le faaofuofu o le tānoa. Sasaa i totonu le pe'epe'e ona i'o mai lea i le umu o ni maa a'asa lelei se lua pe tolu, ma tuu i totonu o le tānoa oloo iai le pe'epe'e.

Asuasu le pe'epe'e i luga o maa a'asa se'ia usi le niu, ona avane loa lea o le 'alava ua lolo'u ma fai ai puta.



O laumaopo lautetele ua uma ona lalagi, e faaofuofu ona asu lea i ai o le taufolo ma tufa loa i le saofaiga.

Fa'atinoga 1

Gaosiga o le taufolo

1. Galulue ta'ito'aono.
2. Lisi i lalo mea uma oloo fai ai le taufolo.
3. Talanoa i itu nei ma faamaumau:
 - Aiseā e lelei ai na'o le 'aveloloa?
 - Aiseā e lē lelei ai isi 'ulu?
 - O le ā le 'ulu a lē maua se 'aveloloa ona fa'aaogā lea? O le ā lona faiga?
4. Tu'ufaatasi le vasega ae nonofo a vaega.
5. Auaua'i vaega mo fetufāiga.
6. Talanoa i tali o fesili na lāgā.
7. Ao pepa uma i le faiā'oga.

Fa'atinoga 2

Gasesega o le Taufolo

1. Galulue ta'ito'alima.
2. Talanoa i le lisi o mea uma e fa'aaogā mo le faiga o le Taufolo pei o lea.

Lisi

'aveloloa	i'ofi
popo	fofo'e
fafie	'autu'i
afi	'alava
tuai	lau'ulu
mele'i	pe'epe'e
tānoa	maa 'a'asa
tāuaga	

3. Vaevae ta'ilima upu o le lisi a le vaega po o vaega e lua.
4. Tofu le tagata o le toalima ma lana upu e faamatala, ae faalogologo le vaega.

Tagata	i.	-	'aveloloa	popo	tānoa
	ii.	-	fafie	afi	i'ofi
	iii.	-	fofo'e	tuai	lau'ulu
	iv.	-	'autu'i	mele'i	pe'epe'e
	v.	-	'alava	tāuaga	maa 'a'asa

E mafai ona faamatala faapea:

Ft 1: ‘alava - O le fasi lapalapa mafolafola pe lua inisi le lautele, ae pe sefululua inisi le umi, e sae mai i le alo o le lapalapa o le launiu, ona lolo’u lea faaofuofu ma taofi e tamatama’ilima, ae tipi ai puta o le taufolo niu.



Ft 2: ‘autu’i - E toli pe tau mai le ‘ulu moto (puou) ona fa’i ese lea o le ‘au o le fune ma faaalu le apulupulu. Fisi fa’amaai pito ta’itasi o fasi la’au se tolu pei ni tama’ilima le lapopo’a ae ono i le valu inisi le uumi, ona tutu’i lea faamaumau faataamilo i le mata o le ‘ulu moto i le mea sa tu ai le fune ‘ulu, fuafua ia opo lelei le ‘u’u. ‘Ave le ‘autu’i e lagilagi le ulu faama’au’a ona loiloi lea i le pe’epe’e ma tu’i loa le taufolo. (A iloa ua tu’i atu ma pipii le ‘autu’i i ‘ulu malū, ona toe faamase’ese’e foi lea i le pe’epe’e.)

5. Tu’ufaatasi le vasega ma fetufā’i auaua’i vaega.
6. Si’i i lau api galuega mana’omia.
7. Ao i le faia’oga api faatasi ma galuega a vaega.

Fa’atinoga 3

Gagana

1. Vaevae le vasega i vaega e fa.
2. Talanoa i upu ma faaupuga o le taufolo ma faaupuga e mafai ona feso’otai atu i le taufolo.

Vaega 1 - fatumalemo

‘ausa’alo

umete

tanu le ‘ausa’alo

Vaega 2 - fuata ma lona lou

palasi le fuata

faavailau’ulu

lau’ulu saposapo

Vaega 3 - tunu ‘ulu

fofo’e ulu

loiloi le ‘autu’i

tipi puta

Vaega 4 - o le ua

faalanuma’ave’ave

tauvae

ususū


i’ofatu

3. Faamaumau faamatalaga i le siata.
4. Tuufaatasi vaega.
5. Auaua’i i luma o le vasega mo fetufā’iga.
6. Ao siata i le faia’oga pe’ā uma ona sii i api.

Fa'atinoga 4 Taufolo sami

1. Talanoa ma le vasega i le taufolo sami.
2. O ā ni 'ese'ese o le taufolo niu ma le taufolo sami?

Vaai i le siata




Fa'atinoga 5 O le faiga o le Taufolo Sami

1. Galuega Felagolagoma'i.
2. Galulue ta'ito'afā; e to'atasi e avea ma failautusi e faamaumuina faamatalaga, ae galulue le toatolu e faamatala faasolo galuega o le faiga o le taufolo sami. Ia aofia ai itu nei:
 - faaputu i le ogatotonu o le tanoa 'ulu tu'i
 - sasa'a i ai sami ma le pe'epe'e
 - fifi ma asu i laumaopo lalagi
 - tufa i le fale
3. Tuufaatasi le vasega.
4. Fetufā'i auaua'i.
5. Tusi i api.
6. Ao i le faiā'oga siata ma api.

Fa'atinoga 6 Faalauteleaga o le gagana

1. Galulue ta'itoafā.
2. Fili mai upu uiga tutusa ma upu uiga fa'aaloalo e fa'aapogāleveleve. Talanoa ma fa'aopoopo le lisi a le vaega.



Fa'atinoga 7 Tusigatala


1. Galulue Ta'ito'aluā.
2. Tusi le tala a le vaega i se ulutala:
 - O le Taufolo Niu.
 - O le Taufolo Sami.
3. Tuufaatasi le vasega.
4. Auaua'i i luga mo fetufā'iga.
5. Faapipii i luga o le laupapa faalauiloa tala lelei uma.
6. Galulue taito'atasi.
7. Tusi le tala a le tagata.
8. Ao api i le faiā'oga.

Fa'atinoga 8

Galulue taito'afā

1. Fili le mea'ai a le vaega e faamatala.
2. Ia manino mea e gaosi ai, ma le auala e fai ai.

Faaapogāleveleve o taumafa



Fa'atinoga 9

Tusiga Ata

1. Galulue ta'ito'afā.
2. Pule le tagata o le vaega ma le vaaiga o le gāsesega o le taufolo niu po o le taufolo sami e tusi i ai lana ata.

Nisi o vaaiga mananaia:

- tu'iga o le taufolo.
- faiga o le 'autu'i.
- fifiga o le taufolo.
- si'iga o le tanoa i le fale o matai.
- asuga o le taufolo i laumaopo.

3. Tuufaatasi ata a le vaega.
4. Faavasega ma faapipii i luga o se pepa lapoa.
5. Auaua'i vaega i luga mo fetufāiga. O lea faiga e matua faamatala auiliili ai le faasologa o ata a le vaega.
6. Fuafua e le faiā'oga togi o le galuega a le vaega ma lau ia maua le muamua.
7. O lea auala e faaosofia ai le agaga fia fai mea lelei: Tutū faaitualalua le vasega, ae savavali i totonu le vaega ua manumalo ma siisii talotalo ane o latou lima i le vasega, ae lafo atu e le vasega le faamalō.

Fa'atinoga 10

Fa'atinoga

Ia manatua ma malamalama:

- E tatau lava ona faatino gāsesega e le'i vā'ai i ai tamaiti; ma o le taumafa na tusi i ai le tala a le vaega, o latou foi e tatau ona faatinoina (vā'ai i le Faatinoga 7). O taufolo, o aso o le fuata e faatino ai. Su'e pea ni 'aveloloa ma se tānoa. E mafai ona fesoasoani tamaiti e aumai ni isi o mea oloo maua i o latou 'āiga.
- E manaia pe ā galulue a vaega. E mafai ona valaaulia isi vasega o le Tausaga 9 pe'ā fai e sili atu i le tasi T.9 a le ā'oga. A leai, e mafai ona faatonu ni vaega se lua pe tolu e faatino a latou gāsesega fuafua i le piliota, ae tuu isi faatinoga a isi vaega mo se isi avanoa, pe se'i tū'ua le ā'oga.
- Mo le aumatamata: Faatumu le pepa lea.

Igoa o le mea'ai: _____

Mea oloo gaosi ai: _____

Faasologa o le gasesega: _____

- Tofo: 1. leaga 2. feoloolo 3. lelei 4. O le matuā mea lelei lava

Vaega 4

Faitauga Fa'aSāmoa

O aso anamua, a o le'i taunuu mai misionare sa iai le auala a Sāmoa sa faitau ai fua o faatoaga; manulele ma manuvaefā. O i'a, figota ma isi meaola o le sami ma le vao, sa fua ai le umi ma tau ai aso. Sa faitau ai tagata ma mea lalaga.

Sa a'oa'oina tagata Sāmoa i le tusiga ma le faitauga o fuainumera, le faaroma ma le faaarapi. O ia suiga, ua suia ai le faitau mai le faitauga fa'asāmoa masani sa iai.

Fa'ata'ita'iga -

Faitauga i aso nei	Faitauga i aso anamua
Fitu 'ulu	Fitugafua
Fitu sefulu 'ulu	Fuafitu
Sefulu fitu 'ulu	Fuāgafulu ma le fitu

E ui i lea, e le'o afaina le faitauga fa'asāmoa, auā oloo malamalama ma manino le aofa'iga. Ua lelei foi lea, e fesuia'i ai le faitauga ma lona faamatalaga i nisi o taimi.

O le agaga moni o lenei galuega ia faasa'o ma faaolaola la tatou auala o le faitauga fa'asāmoa.

Fa'atinoga 1

Faitauga o 'ulu

1. Galulue ta'ito'afā.
2. Faatutumu avanoa i upu sa'o o le faitauga fa'asāmoa po o aso nei, po o aso anamua.

Faitauga i aso nei	Faitauga i aso anamua
1. sefulu 'ulu	
2. fuāgafulu ma l e tasi	
3. tolusefulu ma le tolu	
4. fitugafua	
5. fa 'ulu	

FAITAUGA FAASĀMOA

I'a moto ma fala

1 le i'a	Tasigalau
2 i'a	Luagalau
3 i'a	Tolugalau
4 i'a	Fagalau
5 i'a	Limagalau
6 i'a	Onogalau
7 i'a	Fitugalau
8 i'a	Valugalau
9 i'a	Ivagalau
10 i'a	Lauagafulu
11 i'a	Lauagafulu ma le tasi
12 i'a	Lauagafulu ma le lua
13 i'a	Lauagafulu ma le tolu
14 i'a	Lauagafulu ma le fa
15 i'a	Lauagafulu ma le lima
16 i'a	Lauagafulu ma le ono
17 i'a	Lauagafulu ma le fitu
18 i'a	Lauagafulu ma le valu
19 i'a	Lauagafulu ma le iva
20 i'a	Laulua
21 i'a	Laulua ma le tasi

22 i'a	Laulua ma le lua
23 i'a	Laulua ma le tolu
30 i'a	Lautolu
40 i'a	Laufa
50 i'a	Laulima
60 i'a	Lauono
70 i'a	Laufitu
80 i'a	Lauvalu
90 i'a	Lauiva
100 i'a	Lauselau
101 i'a	Lauselau ma le tasi
102 i'a	Lauselau ma le lua
103 i'a	Lauselau ma le tolu

Fa'atinoga 2

Faitauga o l'a

1. Galulue ta'ito'alua.
2. Fa'atumu avanoa i le faitauga sa'o fa'asāmoa.

35 i'a _____

68 i'a _____

44 i'a _____

76 i'a _____

83 i'a _____

Atu - Tasi e o'o i le 9 atu, e faitau sa'o lava

1 le atu

2 atu

3 atu

4 atu

5 atu

6 atu

7 atu

8 atu

9 atu

10 atu - atoa

11 atu - atoa ma le tasi

- 12 atu - atoa ma le lua
 13 atu - atoa ma le tolu
 14 atu - atoa ma le fa
 15 atu - atoa ma le lima
 16 atu - atoa ma le ono
 17 atu - atoa ma le fitu
 18 atu - atoa ma le valu
 19 atu - atoa ma le iva
 20 atu - tinolua po o le luaga'aui
 21 atu - tinolua ma le tasi
 - luaga'aui ma le tasi
 22 atu - tinolua ma le lua
 - luaga'aui ma le lua
 23 atu - tinolua ma le tolu
 - luaga'aui ma le tolu
 24 atu - tinolua ma le fa
 - luaga'aui ma le fa
 30 atu - tinotolu/toluga'aui
 40 atu - tinofa/faga'aui
 50 atu - tinolima/limaga'aui
 60 atu - tinoono/onoga'aui
 70 atu - tino fitu/fituga'aui
 80 atu - tino valu/valuga'aui
 90 atu - tinoiva/ivaga'aui
 100 atu - tinoselau

Fa'atinoga 3

Faitauga o atu

1. Galulue ta'ito'alua.
2. Fa'atumu avanoa i le faitauga sa'o fa'asāmoa.

57 atu _____

66 atu _____

71 atu _____

99 atu _____

106 atu _____

Talo

- 1 le talo - tasigamata
- 2 talo - luagamata
- 3 talo - tolugamata
- 4 talo - fāgamata
- 5 talo - limagamata
- 6 talo - onogamata
- 7 talo - fitugamata
- 8 talo - valugamata
- 9 talo - ivagamata
- 10 talo - matāgafulu
- 11 talo - matāgafulu ma le tasi
- 12 talo - matāgafulu ma le lua
- 13 talo - matāgafulu ma le tolu
- 14 talo - matāgafulu ma le fa
- 15 talo - matāgafulu ma le lima
- 16 talo - matāgafulu ma le ono
- 17 talo - matāgafulu ma le fitu
- 18 talo - matāgafulu ma le valu
- 19 talo - matāgafulu ma le iva
- 20 talo - matalua
- 21 talo - matalua ma le tasi
- 22 talo - matalua ma le lua
- 23 talo - matalua ma le tolu
- 24 talo - matalua ma le fa
- 25 talo - matalua ma le lima

- 26 talo - matalua ma le ono
- 27 talo - matalua ma le fitu
- 28 talo - matalua ma le valu
- 29 talo - matalua ma le iva
- 30 talo - matatolu
- 40 talo - matafā
- 50 talo - matalima
- 60 talo - mataono
- 70 talo - matafitu
- 80 talo - matavalu
- 90 talo - mataiva
- 100 talo - mataselau

Fa'atinoga 4

Faitauga o talo

1. Galulue ta'ito'alu.
2. Fa'atumu avanoa i le faitauga i aso nei. O le faitauga faasāmoa anamua olo'o avatu ai.
3. Tuufa'atasi vaega mo fetufā'iga.
 - a. Matatolu ma le iva _____.
 - e. Matagafulu ma le lima _____.
 - i. Matafā ma le tasi _____.
 - o. Mataselau ma le tolu _____.

'Ulu, Moa, Lupe ma Manutagi

- tasi - tasigafua
- lua - luagafua
- tolu - tolugafua
- fa - fāgafua
- lima - limagafua
- ono - onogafua
- fitu - fitugafua
- valu - valugafua
- iva - ivagafua
- 10 - fuāgafulu
- 11 - fuāgafulu ma le tasi
- 12 - fuāgafulu ma le lua

- 13 - fuāgafulu ma le tolu
- 14 - fuāgafulu ma le fa
- 15 - fuāgafulu ma le lima
- 16 - fuāgafulu ma le ono
- 17 - fuāgafulu ma le fitu
- 18 - fuāgafulu ma le valu
- 19 - fuāgafulu ma le iva
- 20 - fualua
- 30 - fuatolu
- 40 - fuafā
- 50 - fualima
- 60 - fuaono
- 70 - fuafitu
- 80 - fuavalu
- 90 - fuaiva
- 100 - fuaselau

‘Aufa’i ma ufi

- 1 - tasiga‘au
- 2 - luaga‘au
- 3 - toluga‘au
- 4 - fāga‘au
- 5 - limaga‘au
- 6 - onoga‘au
- 7 - fituga‘au
- 8 - valuga‘a
- 9 - ivaga‘au
- 10 - ‘auagafulu
- 11 - ‘auagafulu ma le tasi
- 12 - ‘auagafulu ma le lua
- 13 - ‘auagafulu ma le tolu
- 14 - ‘auagafulu ma le fa
- 15 - ‘auagafulu ma le lima
- 16 - ‘auagafulu ma le ono
- 17 - ‘auagafulu ma le fitu
- 18 - ‘auagafulu ma le valu

- 19 - ‘auagafulu ma le iva
- 20 - ‘aulua
- 30 - ‘autolu
- 40 - ‘aufā
- 50 - ‘aulima
- 60 - ‘auono
- 70 - ‘aufitu
- 80 - ‘auvalu
- 90 - ‘auiva
- 100 - ‘auselau

Fa’atinoga 5

Ufi ma Fa’i

1. Galulue ta’ito’alua.
2. Liliu i le faitauga o aso nei.
3. Tuufa’atasi vaega. Fetufā’i:
 - a. luaga’au _____.
 - e. ‘auagafulu ma le tasi _____.
 - i. ‘aulua ma le lua _____.
 - o. ‘auono ma iva _____.
 - u. ‘auselau ma le luaga’au _____.

Niu & Popo

O niu, popo ma tama’ipua’a, e tutusa le faitauga, petai’i oloo taofi ‘ese’ese nisi.

O lo latou taofi, o pua’a lapopo’a e faitau ae le’o toloa’iga. Afai o le nuu e faitau pua’a lapopo’a, ae le’o tama’ipua’a, alu ai, auā e pule le agaifanua.

O se isi taofi, e faitau niu ae lē faitaua popo, peita’i o le mau a le aumātutua e to’atele na saili i ai se tonu, faatasi ma faamaumauga e faitau uma, auā o la’ugapopo ma pulu, o galuega fai so’o o le vaiaso.

O popo, niu ma tama’ipua’a e faitau ta’ilua.

		Faitauga
Tasi le taulua	2 niu/popo/tama’ipua’a	tasigaoa
Lua taulua	4 niu/popo/tama’ipua’a	luagaoa
Tolu taulua	6 niu/popo/tama’ipua’a	tolugaoa
Fā taulua	8 niu/popo/tama’ipua’a	fāgaoa
Lima taulua	10 niu/popo/tama’ipua’a	limagaoga

3 niu/popo/tama'ipua'a	tasigaoa ma le tasi
5 niu/popo/tama'ipua'a	luagaoa ma le tasi
7 niu/popo/tama'ipua'a	tolugaoa ma le tasi
9 niu/popo/tama'ipua'a	fāgaoa ma le tasi
11 niu/popo/tama'ipua'a	limagaoa ma le tasi
13 niu/popo/tama'ipua'a	onogaoa ma le tasi
15 niu/popo/tama'ipua'a	fitugaoa ma le tasi
17 niu/popo/tama'ipua'a	valugaoa ma le tasi
19 niu/popo/tama'ipua'a	ivagaoa ma le tasi
20	- seaea/tasigaea
40	- luaea/luagaea
60	- toluea/tolugaea
80	- fāea/fāgaea
100	- limaea/limagaea

Fa'atinoga 6

Niu ma Popo

- Galulue ta'ito'alua.
- Toe tusi i le faitauga faasamoa moni.
 - 12 popo _____.
 - 33 popo _____.
 - 89 popo _____.
 - 37 niu _____.
 - 45 niu _____.

Fa'atinoga 7

Fa'aaogā faitauga fa'asāmoa

- Galulue ta'itoafā.
- Tusi le faitauga faasāmoa o popo.
- Tuufaatasi vaega ma fetufaa'i.
- Tusi i lau api.

49 _____

66 _____

81 _____

92 _____

110 _____

O pa'a, ula ma fee mata

- 1 - tasigatu'e
- 2 - luagatu'e
- 3 - tolugatu'e
- 4 - fāgatu'e
- 5 - limagatu'e
- 6 - onogatu'e
- 7 - fitugatu'e
- 8 - valugatu'e
- 9 - ivagatu'e
- 10 - tu'eagafulu
- 12 - tu'eagafulu ma le lua
- 13 - tu'eagafulu ma le tolu
- 14 - tu'eagafulu ma le fā
- 15 - tu'eagafulu ma le lima
- 16 - tu'eagafulu ma le ono
- 17 - tu'eagafulu ma le fitu
- 18 - tu'eagafulu ma le valu
- 19 - tu'eagafulu ma le iva
- 20 - tu'elua
- 21 - tu'elua ma le tasi
- 22 - tu'elua ma le lua
- 23 - tu'elua ma le tolu
- 24 - tu'elua ma le fa
- 25 - tu'elua ma le lima
- 26 - tu'elua ma le ono
- 27 - tu'elua ma le fitu
- 28 - tu'elua ma le valu
- 29 - tu'elua ma le iva
- 30 - tu'etolu
- 40 - tu'efā
- 50 - tu'elima
- 60 - tu'eono
- 70 - tu'efitu
- 80 - tu'evalu

- 90 - tu'eiva
- 100 - tu'eselau

Fa'atinoga 8 Tau'aiga

1. 'Au tama, 'au teine, faafesaga'i.
2. Faamasino ma fai fesili e le faiā'oga.

Faata'ita'iga:

- To'atasi le tama, tasi le teine.
- O le tau'aiga, e fai i le vave ma le sa'o o le tali.
- A pē ma nofo i lalo ae faasolo pea le 'au se'ia māe'a.

Faiaoga: Sauni, 3 fe'e (mata)

Tali: _____

Faiaoga: 10 pa'a

Tali: _____


3. Fa'amaumauga i luga o le laupapa.

TAMA		TEINE	
'Ai	Pē	'Ai	Pē

- Faaopoopo togi o 'au.
- Faailoa le 'au manumālō.
- Fa'aailoga o le 'au manumālō. E mafai ona teufale le 'au faia'ina i le aso lea ae malolo le vaega teufale o le vaiaso.
- E mafai ona faaavanoa le 'afa itula mulimuli o le aso pe tasi pe lua i le vaiaso, e fai ai tau'aiga, e faaaogā ai le faitauga faasāmoa.
- O lea faiga, e ese le vave ona mātatau ai e tamaiti, le faitauga faasāmoa o mea taitasi.

Fai'ai fe'e, fai'ai pusi

Faitauga o fai'ai fee ma fai'ai pusi e 'ofu'ofu ma faavela i le suāvai, e tutusa ma 'ofu palolo, limu, ofu o le pua'a, ma ofugau.



- 10 - 'ofuagafulu
- 11 - 'ofuagafulu ma le tasi
- 12 - 'ofuagafulu ma le lua
- 13 - 'ofuagafulu ma le tolu
- 14 - 'ofuagafulu ma le fā
- 15 - 'ofuagafulu ma le lima
- 16 - 'ofuagafulu ma le ono
- 17 - 'ofuagafulu ma le fitu
- 18 - 'ofuagafulu ma le valu
- 19 - 'ofuagafulu ma le iva
- 20 - 'ofulua
- 21 - 'ofulua ma le tasi
- 22 - 'ofulua ma le lua
- 23 - 'ofulua ma le tolu
- 24 - 'ofulua ma le fā
- 25 - 'ofulua ma le lima
- 26 - 'ofulua ma le ono
- 27 - 'ofulua ma le fitu
- 28 - 'ofulua ma le valu
- 29 - 'ofulua ma le iva
- 30 - 'ofutolu
- 40 - 'ofufā
- 50 - 'ofulima
- 60 - 'ofuono

- 70 - 'ofufitu
 80 - 'ofuvalu
 90 - 'ofuiva
 100 - 'ofuselau

Fa'atinoga 9

Faitau fa'asāmoa

1. Galulue ta'ito'alua.
2. Faatumu avanoa i le faitauga faasāmoa sa'o o taumafa 'ofu'ofu.
 - 14 'ofupalolo _____
 - 19 'ofulimu _____
 - 33 'ofugau _____
 - 7 fai'ai pusi _____
 - 12 'ofu o le pua'a _____
3. Tuufaatasi; ao tali i le faiā'oga.
4. Auaua'i i luga sui o vaega e lau a latou tali. Tapa le pepa tali a le vaega oloo i le faiā'oga pe'ā o'o i lo lā'ua taimi.
5. Si'i i api pe'ā uma le talanoaga.
6. Ao api i le faiā'oga e togi.
7. Toe tufa 'api ma faamalamalama.

AFATO

O 'afato e ofu'ofu fo'i, peita'i o le 'ofu 'afato, e ta'ua o le afilipoi.

- 1 le afilipoi - tasiga'ofu
 2 afilipoi - luaga'ofu
 3 afilipoi - toluga'ofu
 4 afilipoi - fāga'ofu
 5 afilipoi - limaga'ofu
 6 afilipoi - onoga'ofu
 7 afilipoi - fituga'ofu
 8 afilipoi - valuga'ofu
 9 afilipoi - ivaga'ofu
 10 afilipoi - 'ofuagafulu
 20 afilipoi - 'ofulua
 30 afilipoi - 'ofutolu
 40 afilipoi - 'ofufā
 50 afilipoi - 'ofulima

O AFĪ IA

- 1 le afi - tasigāfi (tasigaafi)
- 2 afi - luagāfi
- 3 afi - tolugāfi
- 4 afi - fāgāfi
- 5 afi - limagāfi
- 6 afi - onogāfi
- 7 afi - fitugāfi
- 8 afi - valugāfi
- 9 afi - ivagāfi
- 10 - afiagafulu (sefulugāfi)
- 11 - afiagafulu ma le tasi
- 12 - afiagafulu ma le lua
- 13 - afiagafulu ma le tolu
- 14 - afiagafulu ma le fā
- 15 - afiagafulu ma le lima
- 16 - afiagafulu ma le ono
- 17 - afiagafulu ma le fitu
- 18 - afiagafulu ma le valu
- 19 - afiagafulu ma le iva
- 20 - afilua
- 30 - afitolu
- 40 - afifā
- 50 - afilima
- 60 - afiono
- 70 - affitu
- 80 - afivalu
- 90 - affiva
- 100 - affiselau

Fa'atinoga 10

Folafolaga o taumafa

1. Galulue faatasi.
2. Tusi mai le folafolaga sa'o o le suāvai na ave i le faifeau.

Na'o le 23 tama'i i'a o le lama a le toaina, 12 pa'a ma fe'e e 4. Na affi uma i'a o le faiva. E 6 afi laulelei na maua. Na fai'ai uma pa'a i le ulo, ae 3 fai'ai fe'e na fa'avela i le suāvai.

Folafolaga - Lau susuga i le faafeagaiga ma le faletua, o le suāvai lea na aumai i le tofā a Agafili Laau Tuitolovaa, ole'ā ou folafolaina atu.

2 afi _____

fai'ai pa'a _____

talo ma lu'au _____

3. Tuufaatasi vaega.
4. Auaua'i vaega mo fetufā'iga.
5. Si'i i lau api.
6. Ao api ma ave i le faiā'oga.
7. Toe faamanino le 'ese'esega o le folafolaga o fa'aalologa, ma le faitauga faasāmoa tuusa'o.

Fa'atinoga 11

Tolaulau

1. Galulue ta'ito'atolu.
2. Tolaulau mea o le lama i lona faitauga faasāmoa sa'o.

23 i'a moto _____

12 pa'a _____

3 fe'e _____

3. Tusi i se pepa.
4. Tuufaatasi vaega.
5. Auaua'i vaega mo fetufā'iga.
6. Tusi i lau api.
7. Ao i le faiā'oga.

Vaega 5

O le Faatufugaga

O le Faatufugaga, o le poto ma tomai faasāmoa e mafai ai ona:

- i. fai fale faasāmoa.
- ii. fai vaa faasāmoa.
- iii. ma tā pe'a ma malu faasāmoa.

1. O Tufuga Fai Fale Sāmoa e to'afā:

- i. Leifi.
- ii. Moe.
- iii. Segi.
- iv. Solofuti.

2. O le Tufuga Tā Va'a Sāmoa, o Manufili.

3. O Tufuga Tā Pe'a, e to'alua:

- i. Su'a.
- ii. Tolouena.

Āutalaga 2: TAPU'EINA O TOMAI I ALA FA'ASALALAU

ĀLĀFUA MA FA'ANAUNGA IA 'AUSIA

Ālāfua

Fa'anaunaga ia 'Ausia

E tatau ona mafai e tamaiti ona:

GAGANA

Malamalama i uiga ma faauigaga o upu ma faaupuga i tautalaga ma tusitusiga ua faatulagaina i le āutalaga lenei.

FESO'OTA'IGA

Malamalama i 'autū ma aga o feso'ota'iga i le va ma tagata.

Au'ili'ili matā'upu 'autū o ni feso'ota'iga i luga o leitiō ma televise.

Iloilo faasalalauga po o ni faatalatalanoaga i luga o leitiō ma televise ma faaali manatu i le 'autū, ma gagana o fa'aaogāina.

Iloilo fa'asalalauga eseese i luga o nusipepa ma faaali manatu i metotia o fa'aaogāina ma lo latou talafeagai ma 'autū ma le 'aufaitau.

Iloilo ma fa'a'ese'ese feso'ota'iga i tusitusiga faapisinisi ma tusitusiga ma e masani ft. faaaogaina o le gagana, faavasegaina, 'autū, fau (kalama).


Fai ni faasalalauga faigofie i nusipepa, ma ia faatāuaina le va fealoa'i ma le aufaitau i le gagana o fa'aaogāina, le fa'ata'atiaina ma le fa'avasegaina o le fa'asalalauga.

Fa'atinoga 1

Galuega 'Amata

1. Galulue i vāega.

- a. Lisi mai i se fa'aapogaleveleve ala fa'asalalau ua outou iloa ma itu'āiga feso'ota'iga e fa'atino ai ft.



- e. Lisi mai po o ai le 'aufaitau, 'aumaimoa, 'aufa'alogologo olo'o tāea i ala faasalalau ma itu'āiga feso'ota'iga ua faaapogaleveleveina.
- i. Lisi mai tāua o ala faasalalau i Sāmoa i lenei vaitau.
- f. O ā ni auala sa fa'aaogā i aso la mo faasalalauga ma feso'ota'iga i totonu o nu'u?
- g. O ā ni faamanuiaga ua iai nei i suiga o ala faasalalau ma feso'ota'iga?
- l. O ā ni a'afiaga e ono alia'i mai i ala faasalalau ua iai nei? ft. televise, nusipepa, leitiō ma ni a'afiaga o le aganu'u, va fealoa'i, gagana mf.

Fa'atinoga 2

Feso'ota'iga i ala fa'asalalau: Faitau malamalama

1. Galulue ta'ito'alima.

- a. Faitau ta'ito'atasi muamua palakalafa ua tusia i lalo.
 - A uma ona faitau palakalafa ta'itasi ona faatino lea e le tou vaega galuega olo'o avatu i lalo o palakalafa e faamalamalama atili ai matā'upu tāua. Tofu le tagata o le vaega ma lana galuega e faatino. Fesuia'i galuega pe 'ā sui palakalafa.
- e. A mǎe'a galuega olo'o i le (a), ona vaevae lea o le vasega 'atoa i ni laina se lua fa'afesaga'i.
 - Fa'amatala muamua e le laina o i le ituagavale manatu 'autū o i le tusitusiga sa faitau i ai mo se 2 minute.
 - Faamatala e le laina o i le itu taumatau ni fa'aaogaga o manatu 'autū po o ni fa'ata'ita'iga. E mafai ona amata faapea: "O lona uiga e tatau i le 'aufaitau, 'aumaimoa, 'aufa'alogologo ona . . .", mo le 2 minute.

Feso’ota’iga i ala fa’asalalau

O ala faasalalau masani i neionapo ua aofia ai leitiō, nusipepa, ma televise. Peita’i ua iai fo’i se isi o ala faasalalau fou ua ofi mai i le faaaogāina o le so’oatulau po o le initaneti i komipiuta. Ua fa’aaogā lenei ala fa’asalalau i faasalaulauga faapisinisi, o talafou, ma feso’ota’iga e faaaogā ai malosi faaeletonika po o le imeli (electronic mail – e-mail).

Ua aofia i ala faasalalau faiga e pei o lolomiga o ni tagāvai a kamupani i mitiafu; o ni faasalaulauga o ni matā’upu tāua fa’alaua’itele po o le fa’atosina fo’i i mitiafu, ft. “Taofi le saosaoa o lau ta’avale”, po o le “Fa’aititia le taumafa tapa’a”. O ni isi ala fa’asalalau o laupapa po o ni ‘ie tusi matamata tetele ua va’aia i tafatafa o alatele aemaise lava taula’iga o magāala. O ni isi fo’i fa’asalaulauga ua tusia i tino o ta’avale, pasi, loli, po o ua lolomiina faapitoa i pepa (stickers) mo le faapipiina i ta’avale.

O le faatupula’ia pea o feso’ota’iga i ala faasalalau ese’ese ua mo’omia ai ona atina’e tomai e au’ili’ili matā’upu i ala faasalalau, faaali manatu i le ‘autū, gagana o faaaogāina, ma mata’itū auala po o metotia olo’o fa’aaogā e pu’ea lagona o le ‘aufaitau, ‘aumaimoa, ma le ‘aufa’afofoga.

- Galuega 1: Aotele manatu o palakalafa.
- Galuega 2: Fa’afeso’otai matā’upu o palakalafa ma ni tulaga ua e iloa ft. aumai ni faataita’iga.
- Galuega 3: Aumai se fesili tatala i se tulaga o i palakalafa.
- Galuega 4: Fa’auma e oe le laina lea e faatatau i palakalafa: O lona uiga la . . .
- Galuega 5: Faamatala e oe le faasologa ma le faavasegaga o palakalafa.

O feso’ota’iga uma i luga o ala faasalalau ua fausia i va’aiga, manatu ma lagona o ē na tapenaina. E iloa ia tulaga i ni faai’uga ua filifilia e tusitala i nusipepa, le ‘au faipolokalame i le televise, o ē tusitala i makasini, ma ē faia faasalaulauga faapisinisi. O ni isi nei o fesili e fai i ai fa’ai’uga a le ‘au tusitala ma ē nafa ma feso’ota’iga i ala faasalalau:

- O le ā le tala o le ‘ā faamatala pe lipotia?
- O le vaai a ai o le ‘ā fa’amatala pe folasia ai le tala?
- E fa’apefea ona pu’eina le ata (o le itu olo’o i ai le mea pu’eata, o le faasologa o ata, o le filifilia o ata e pu’e latalata mf.).
- E faapefea ona faatonutonu ma teuteu le tala po o le ata? O lona uiga, o ā vaega ‘ole’ā lolomiina pe faaalua pe ‘ā uma le teuteuga faai’u? O ā vaega ‘ole’ā fa’ata’atia e lē lolomiina ma aiseā fo’i?
- O le ā le itu’āiga musika olo’o fa’aaogā?
- O le leo o ai olo’o fa’alogoina?
- O le ā le fe’au tāua olo’o fia momoli mai?

- Galuega 1: Aotele manatu o palakalafa.
- Galuega 2: Fa'afeso'otai matä'upu o palakalafa ma ni tulaga ua e iloa ft. aumai ni faataita'iga.
- Galuega 3: Aumai se fesili tatala i se tulaga o i palakalafa.
- Galuega 4: Fa'auma e oe le laina lea e faatatau i palakalafa: O lona uiga la . . .
- Galuega 5: Faamatala e oe le faasologa ma le faavasegaga o palakalafa.

E ao ona sogasogā le 'aufaitau, 'aumaimoa, ma le 'aufa'afofoga i fa'aaogaga o ala fa'asalalau. O ni fesili e ono fesiligia ai feso'ota'iga i ala faasalalau e faapea:

- O ai na tu'ufaatasia ata / tusitusiga olo'o faitau, fa'alogo pe maimoa i ai?
- O ai olo'o tautala?
- O leo po o manatu o ai e le'o faalogoina i le tala, ata?
- O le vaai po o manatu o ai olo'o pu'ea ai mea o tutupu i le tala po o le ata?
- O ai e ona le ala faasalalau?

O ni isi ia o fesili e fa'ata'imuaina le taumafai ina ia malamalama atili i ala o faasalalau, i aga olo'o faaaogāina e fatua'i ai manatu ma lagona, o ā latou faavasegaga, ma faauigaga o le olaga.

- Galuega 1: Aotele manatu o palakalafa.
- Galuega 2: Fa'afeso'otai matä'upu o palakalafa ma ni tulaga ua e iloa ft. aumai ni faataita'iga.
- Galuega 3: Aumai se fesili tatala i se tulaga o i palakalafa.
- Galuega 4: Fa'auma e oe le laina lea e faatatau i palakalafa: O lona uiga la . . .
- Galuega 5: Faamatala e oe le faasologa ma le faavasegaga o palakalafa.

La'asaga o tomā i ala faasalalau

O le atina'eina o tomā i uiga o ala fa'asalalau pe tusa ma le tolu ni la'asaga ua aofia ai.

O le laasaga muamua o le malamalama lea i tulaga tatau i faaaogaga o ala faasalalau. O se faataita'iga, e tāua le paleni o fa'aaogaga o ala faasalalau e le tagata lava ia, ma ua aofia ai le mafai ona filifili taimi e matamata ai i le televise ma itu'āiga polokalame e matamata ai nai lo le matamata faasoloatoa e aunoa ma ni tapasā; o le iloa filifili tusitusiga e talafeagai ona faitau ai; ta'aloga fa'aeletonika e tatau ona ta'aalo ai; o faamatā upega (websites) e tatau ona faaaogā i le so'oatulau initaneti mf.

- Galuega 1: Aotele manatu o palakalafa.
- Galuega 2: Fa'afeso'otai matā'upu o palakalafa ma ni tulaga ua e iloa ft. aumai ni faataita'iga.
- Galuega 3: Aumai se fesili tatala i se tulaga o i palakalafa.
- Galuega 4: Fa'auma e oe le laina lea e faatatau i palakalafa: O lona uiga la . . .
- Galuega 5: Faamatala e oe le faasologa ma le faavasegaga o le palakalafa.

O le lonalua o la'asaga o le atina'eina o tomai e iloilo toto'a ma au'ili'ili feso'ota'iga i ala faasalalau. O se faataita'iga, o le iloa mātau uiga o se ata o i se faasalalauga, o auala na tu'ufa'atasia ai ma ni va'aiga e le'o aofia ai; o le mafai ona mātau talitonuga olo'o fa'avae ai se tusitusiga po o se faasalauga i se nusipepa; o le mafai ona fetu'una'i ma fua le moni o ni fa'amatalaga ua aumai i se faasalalauga fa'apisinisi.

- Galuega 1: Aotele manatu o palakalafa.
- Galuega 2: Fa'afeso'otai matā'upu o palakalafa ma ni tulaga ua e iloa ft. aumai ni faataita'iga.
- Galuega 3: Aumai se fesili tatala i se tulaga o i palakalafa.
- Galuega 4: Fa'auma e oe le laina lea e faatatau i palakalafa: O lona uiga la . . .
- Galuega 5: Faamatala e oe le faasologa ma le faavasegaga o le palakalafa.

O le lonatolu o la'asaga o iloiloga loloto i feso'ota'iga i ala faasalalau. O se fa'ata'ita'iga, o le fesiligia o ni isi o tulaga o ala faasalalau e pei: O ai olo'o faia feso'ota'iga i luga o ala faasalalau, ft. o tusitusiga i nusipepa, o faasalalauga i televise, mitiafu, laupapa, mf.; o ā 'autū o ia feso'ota'iga?; o ai e faamanuiaina ai?; o ai o le 'ā faiā'ina pe fa'aleagaina ai?; a o ai fo'i e faia filifiliga i na feso'ota'iga, fa'asalalauga?

O le 'auga o le tapu'eina o tomai o le Tausaga 9 i ala faasalalau, ua mafuli lea i le la'asaga muamua ma le lonalua.

- Galuega 1: Aotele manatu o palakalafa.
- Galuega 2: Fa'afeso'otai matā'upu o palakalafa ma ni tulaga ua e iloa ft. aumai ni faataita'iga.
- Galuega 3: Aumai se fesili tatala i se tulaga o i palakalafa.
- Galuega 4: Fa'auma e oe le laina lea e faatatau i palakalafa: O lona uiga la . . .
- Galuega 5: Faamatala e oe le faasologa ma le faavasegaga o le palakalafa.

Fa'atinoga 3

Laasaga muamua: Tulaga tatau i faaaogaga o ala faasalalau

1. O le la'asaga muamua i le atina'eina o tomai i ala faasalalau o le malamalama i tulaga tatau i faaaogaga o ala faasalalau. O se faata'ita'iga, o le mātau lea po o le ā le tele o taimi olo'o matamata ai i le televise; o itu'āiga polokalame olo'o matamata ai; o ata tifaga e matamata ai; o polokalame o le leitiō e faalogologo ai; o tusitusiga e faitau ai m.f.
 - a. Mātau lou fa'aaogāina o ala faasalalau i se vaiaso. Va'ai i le fa'ata'ita'iga olo'o avatu i le fa'aaogāina e Teuila o ala faasalalau i le vaiaso. Tusi sau siata e pei o le siata a Teuila. Fa'aaogā e faamaumau ai taimi e te fa'aaogā ai ala faasalalau ta'itasi ma itu'āiga polokalame i taimi ia.
 - e. A mē'a le vaiaso ona faitau aofa'i lea o taimi e faaaogā ai ala faasalalau uma, ma ala faasalalau ta'itasi.
 - i. Aotele i ni palakalafa se lua pe tolu lou fa'aaogāina o ala faasalalau. Va'ai i le aotelega a Teuila mo se fa'ata'ita'iga.

Fa'aaogaga o ala faasalalau e Teuila (10 tausaga) i le vaiaso

	Aso Gafua		Aso Lua		Aso Lulu		Aso Tofi		Aso Faraile		Aso Toona'i		Aso Sa		Aofa'i o taimi o ala faasalalau ma pasene (%) i le vaiaso
	Taimi	Polokalame	Taimi	Polokalame	Taimi	Polokalame	Taimi	Polokalame	Taimi	Polokalame	Taimi	Polokalame	Taimi	Polokalame	
Leitiō	30 minute	Talafou Tala o le tau Mālū o le ta'ao	30 minute	Talafou Tala o le tau Mālū o le ta'ao	30 minute	Talafou Tala o le tau Mālū o le ta'ao	30 minute	Talafou Tala o le tau Mālū o le ta'ao	30 minute	Talafou Tala o le tau Mālū o le ta'ao	Taimi	Polokalame	Taimi	Polokalame	2.5 itula 11 %
Nusipepa	30 minute	ata komi (cartoons) Talafou Ata tifaga	30 minute	ata komi (cartoons) Talafou Ata tifaga	30 minute	ata komi (cartoons) Talafou Ata tifaga	30 minute	ata komi (cartoons) Talafou Ata tifaga	30 minute	ata komi (cartoons) Talafou Ata tifaga	Taimi	Polokalame	Taimi	Polokalame	2.5 itula 11 %
Televise	2 itulā	Polokalame a tamaiti Talafou Tala i nu'umamao	2 itulā	Polokalame a tamaiti Talafou Tala i nu'umamao	2 itulā	Polokalame a tamaiti Talafou Tala i nu'umamao	2 itulā	Polokalame a tamaiti Talafou Tala i nu'umamao	2 itulā	Polokalame a tamaiti Talafou Tala i nu'umamao	3 itulā	Polokalame a tamaiti Talafou Tala i nu'umamao	3 itulā	Polokalame a tamaiti ata vito talafou	17 itula 72%
Initaneti											30 min	imeli			0.5 itula 2%
Tupe faileo (Cd Rom)			1 itulā	Facamatalaga i isi atunu'u Matā'upu o le a'oga											1 itula 4%
Aofa'i o taimi fa'aaoga i le vaiaso	3 itulā		4 itulā		3 itulā		3 itulā		3 itulā		4.5 itulā		3 itulā		23.5 itula

Aotelega o le fa'aaogāina e Teuila o ala fa'asalalau i le vaiaso

Aotelega o le vaiaso

Ua manino mai i le siata e 23 ma le afa itula e fa'aaogā ai e Teuila ala fa'asalalau i le vaiaso. O lenā taimi 'atoa e pito i sili ona fa'aaogā e Teuila le televise e pei ona alia'i mai ai le 72%, soso'o atu ai ma nusipepa, ma le letio e ta'i 11%. E fa'alētele se taimi e faaaogā ai le initaneti ma tupe faileo.

Vaevaega o le vaiaso i pasene

Faalauteleaga o le fa'aaogāina o le ala faasalalau ua tele lona faaaogaga

O taimi fa'aalu o Teuila e matamata ai i le televise ua mafuli lea i polokalame a tamaiti, talafou ma tala i nu'u mamao i aso o le vaiaso, a o fa'ai'uga o le vaiaso ua tele ai ina matamata i polokalame a tamaiti ma ata vito. A fa'atusatusa atu i isi ala faasalalau, ua tele nauā taimi o Teuila e fa'aaogā ai le televise. E jai ni tulaga e lelei ai, ae iai fo'i ni a'afiaga e ono alia'i mai ai. E aogā talafou ma tala mai nuu mamao e malamalama ai i tulaga olo'o iai atunu'u eseese. Ae iai fo'i ni tulaga e tataua ona faaeteete i ata 'ese'ese, e pei o le gagana olo'o fa'aaogāina, o talitonuga, uiga ma aga fa'aalia, o ni fete'ena'iga o ia uiga ma tāua o le 'āiga, talitonuga fa'akerisiano, tu ma aga fa'asāmoa.

fa'atusatusa ma isi alafaasalalau

manatu faaali i le tulaga o mafuli i ai faaaogaga

O tulaga o le fa'aaogāina e Teuila o nusipepa ma le leitiō ua aofia ai fo'i ma talafou, ma ni ata komi. O le faifaipea o le faitau nusipepa a Teuila i aso ta'itasi ua iloa ai e mafai ona ia fa'aaogā le nusipepa mo ni tulaga olo'o ia mo'omia e pei o le sa'ili o fa'amatalaga i ata tifaga ma ata komi e fiefia i ai.

Fa'aaogaga o isi ala faasalalau

O fa'aaogaga o ala faasalalau uma nei e tolu o le televise, nusipepa ma le leitiō ua tele ai fo'i le taimi o Teuila e mālamalama ai i talafou ma tala i nu'umamao. O ni a'oa'oga lelei lea mo lona tuputupu a'e.

manatu faaalia

Fa'atinoga 4 Laasaga lonalua: Iloilo toto'a ma au'ili'ili fa'aaogaga o ala fa'asalalau – Fa'asalalauga Fa'apisinisi

O le iloilo toto'a o fa'aaogaga i ala faasalalau e mo'omia ona atina'e ai tomai e au'ili'ili ai matā'upu o i ala fa'asalalau, o manatu 'autū olo'o tu'usa'o ma manatu ua na ona fa'aataata, ma auala olo'o fa'aaogā i le fafauina o ia tu'ufa'atasiga. O se isi fa'aaogaga ta'atele o ala fa'asalalau o le faia lea o fa'asalalauga fa'apisinisi. O galuega au'ili'ili o le faatinoga lenei olo'o taumafai e atina'e tomai i le tu'ufa'atasia o fa'asalalauga fa'apisinisi ma o latou mafua'aga.

1. Faitau malamalama i le faiga o fa'asalalauga fa'apisinisi tususia.

Tulafono o le Vaetoluga (Rule of Thirds)

O le **Tulafono o le Vaetoluga** o se fa'aupuga lea e fa'amatala ai se tasi o faiga ta'atele i fa'asalalauga fa'apisinisi tususia. O lea faiga ua faavasegaina ai se fa'asalalauga i ni vaega tetele se tolu: o le **ulutala, o se ata po o se fa'ailo, ma fa'amatalaga faalautele**. O ni isi fa'asalalauga ua fesuia'i fa'atulagaga o vaega ia, ae o le tele lava ua mulimuli ai. E tāua tele fo'i i fa'asalalauga le lava o le avanoa olo'o fai ai le fa'asalalauga ina ia lē fe'oma'i upu ma ia manuia i le faitau po o le va'ai.

<h1>ULUTALA</h1>
<p>Ata – o le ogātotonu o le fa'asalalauga e iai se ata po o se fa'ailo. O le tele fo'i o avanoa o le fa'asalalauga e ono ave uma e le ata. Afai e iai ni tagata i le ata, o ō latou fofoga (mata) e pito i luga o le vaega lenei o le fa'asalalauga.</p>
<p>Fa'amatalaga – o le vaega lenei e iai ni isi fa'amatalaga i le 'autū o le fa'asalalauga fa'apisinisi. Afai o se kamupanī, e aofia ai la latou fuaitau fa'apitoa (slogan) i le taufa'ai'ui'uga o le fa'asalalauga, o la latou tagāvai (logo), ma numera mo feso'ota'iga.</p>



tagāvai a le kamupanī

1. Fa'ata'ita'iga 1: Kamupanī Va'alele o le Polenisia.

- a. Iloilo le fa'asalalauga fa'apisinisi a le Polenisia ma mātatau vaega 'ese'ese.

tagāvai

Igoa o le kamupanī

O ē ona le kamupanī va'alele

Ulutala {

Ata

faaitau faamuāgagana a le kamupanī

Faamatalaga i le kamupanī {





Malaga ma faamaepaepa i le ave fu'a a lou atunuu lau Polenisia e te mitamita ai. Tautua oe e ou tagata i lau lava gagana.

LE POLENISIA LE AVE FU'A A LOU ATUNUU

Telefoni: 21261, 22737, 22738
Mo nisi faamatalaga faafesootai le numera 21261 poo le 22172 mo le totogiina o lou pasese.

- e. Iloilo le gagana olo'o fa'auapu ai le fa'asalalauga. Va'ai i vaega o le gagana olo'o i fa'auapuga o le fa'asalalauga.





i. O tāua nei o fa’aaogaga o le kalama e pei ona iai i le fa’asalalauga:

- O le amata i veape ft. Malaga ma fa’amaepaepa, Tautua oe, ma le fa’aaogā o fuiuupu veape ft. e te mitamita ai, e faatauānaua le ‘aufaitau e faatau pe faaaogā le auaunaga a le kamupanī. O ni isi fo’i o faasalalalauga faapisinisi e faaaogā veape e tu’usa’o ai ni faatonuga i tagata i ni tulaga e tatau ona fai e pei o le fa’atau pe fa’aaogā auaunaga, po o le taofi fo’i o ni amioga ft. “Fa’atau nei loa e te talitonu ai”, po o le “Tu’u le ‘ave ta’avale saosaoa”.
 - Va’ai i ni isi fa’asalalauga faapisinisi i nusipepa, faalogo i le leitiō, televise, ma faamaopopo i se lisi a la tou vasega faaupuga o faasalalauga faapisinisi olo’o amata i veape. Faamatala le ‘auga o ia faaaogaga.
- Fa’aaogā suinauna o le tagata 2 ft: e te mitamita ai, tautua oe; suinauna o faiā mautinoa tagata 2 ft: lou atunu’u, lau Polenisia, e ou tagata, lau lava gagana. O suinauna faiā e faailoa ai meatotino a tagata. O le faaaogāina o ia suinauna i le faasalalauga a le Polenisia o le taumafai lea e pa’i atu i lagona lotonu’u ma loto Sāmoa o tagata. O le una’iina fo’i lea o tagata ia mafaufau o la latou lava meatotino le Polenisia ma ua tatau ai lava ona fa’aaogā.
 - Aumai ni fa’ata’ita’iga o ni fa’asalalauga olo’o fa’aaogā ai suinauna o le tagata 2, suinauna mautinoa, ma ia faamatala le tāua o ia faiga i le fa’asalalauga.
- Fa’aaogā le gagana e faaosofia ai lagona: ft. faamaepaepa – lagona o le mālōlō, le ave fu’a a lou atunu’u – lagona loto nu’u, loto Sāmoa. O le fu’a a se atunu’u o lana faailo lea ft. e faailoa ai ni tāua faasilisili o le atunu’u i ni ata o iai, e faailoa ni isi vaega o lona talafaasolopito ma faigāmālō, e faailoa ai ona laufanua ma le si’osi’omaga e pei o le aofa’i o motu mf. Afai la o le Polenisia o le ‘ave fu’a a Samoa’ o lona uiga olo’o ia faalauiloaina ni isi o tāua o le atunu’u. O le fa’aupuga, “E te mitamita ai,” o se faaupuga e faaosofia ai le loto mimita, po o le loto fia tagata. A tu’u atu i se isi itu, o lea fo’i fa’aupuga olo’o aumaia se isi o ta’utinoga a le kamupanī e faapea e lē mafai ona fa’atamala le kamupanī ma olo’o mautū tulaga uma o lana auaunaga tatou te mitamita ai.
 - Aumai ni fa’ata’ita’iga o ni fa’asalalauga mai le televise, nusipepa, leitiō, po o laupapa tetele, olo’o fa’aaogā ai le gagana e faaosofia ai lagona o tagata. Ta’u mai le ‘autū o le fa’asalalauga, le gagana ma lagona olo’o fa’aosofia ai.

- Fuaitau faamuāgagana a le kamupanī (slogan):

“LE POLENISIA LE AVE FU’A A LOU ATUNU’U”. O le fuaitau faamuāgagana a se kamupanī o ni fa’aupuga ua lē gata ina fa’aosofia ai lagona o tagata, ae aumai ai fo’i ni mau a le kamupanī i ni tautua po o ni faamanuiaga e maua e tagata iā latou oloa po o auaunaga.

 - Va’ai i ni isi faasalalauga faapisinisi. Ta’u mai ni fuaitau faamuāgagana a kamupanī e ana le fa’asalalauga. Ta’u mai po o ā ni manatu o le kamupanī i la latou tautua ft. “Western Union: Auala silisili ona vave mo tupe faamomoli”. O le fa’aaogā o le fa’aupuga “silisili ona vave”, olo’o aumai ai se manatu o le kamupanī o la latou auaunaga e pito i sili ona vave e ui e lē’o ta’u maia po o ai isi kamupanī po o auaunaga olo’o faatusatusa i ai.
- Sa’ili e le tou vasega ma aoao mai ni isi o faasalalauga faapisinisi mai nusipepa, televise, leitiō, po o tusia fo’i i laupapa tetele i nofoaga faitele. Mātau ma fa’atalanoa vaega olo’o atagia mai i fa’asalalauga ta’itasi ft.
 - Fa’amanino vaega e tolu o le faavasegaga o le faasalalauga: ulutala, ata po o se faailo pe ‘ā iai, faamatalaga.
 - Fa’atonuga po o se augani.
 - Fa’aupuga e amata i le veape.
 - Fa’aaogā o suinauna o le tagata 2.
 - Fa’aaogā o soānauna e faamatala ai se oloa ft. Pe’epe’e lololo.
 - Gagana fa’atusatusa ft. “auala silisili ona vave.”
 - Gagana fa’avi’ivi’i po o ni mau i le lelei o le tautua po o ni oloa.
 - Gagana fa’atauānau i lagona o tagata ft. lagona alofa o tamā i le aso o tinā “Tamā o ‘e sauni ea auā se meaalofa mo tinā i lona Aso Sa faapitoa, tamā e tasi lava le aso faapitoa mo tinā, ‘ae o le fatu’āiga e fa’afesa’aga’i ma ia i aso uma.”
 - O se fa’aupuga e fafagu pe fa’amanatu ai i le ‘aufaitau, ‘aumaimoa, ‘aufa’alogologo se tulaga e ao ona mātā’ituina ft. o le fa’amanatu a le leitiō i se isi o ana polokalame: “Aua nei galo lana mālū o le taeao.”
 - O upu maotua.
 - O ni isi faiga e pei o le fa’aaogā o fesili.
- Fa’aaogā se pusa o fa’amaumauga fa’apea e fa’avasega ai a tou iloiloa.

‘Autū o le faasalalauga	Vaega e tolu	Gagana fa’aviivīfī	Gagana faatusatusa	Muāgagana a le kamupani	Fuiupu veape	Amataga Veape	Faatonuga	Gagana faatauānau
Faasalalauga 1								
Faasalalauga 2								
Faasalalauga 3								
Faasalalauga 4								

- Iloilo ma mātāu vaega ma aga olo’o fa’aaogā i le fa’asalalauina o le apa pe’epe’e. Fa’atino galuega nei:
 - a. Fa’aliliu e le tou vasega ma le faiā’oga le fuaitau o le faasalalauga: “World leading manufacturer of Canned Coconut Cream or Milk. Also manufactures a wide range of exotic and tropical products.” i le gagana talafeagai ma fa’asalalauga fa’apisinisi.
 - e. Fa’amatala po o ā tāua o le fa’aaogā o faiga nei:
 - Fa’atonuga: “Ave se oso mo au malo asiasi mai i Sāmoa.”
 - Suinauna o tagata 2: : “Ave se oso mo au malo asiasi mai i Sāmoa.”; Aisea e te toe popole ai . . .
 - Fesili: “Aisea e te toe . . .
 - Augani: “Lagolago ia Sāmoa ma ana oloa.”
 - Ata: o le sami lanumoana, niu, popo ua ta’e, fala
 - f. O le ā se feso’ota’iga o ata ua tā’ua i luga ma upu fa’aperetania olo’o lolomi i luga o ata: “SĀMOA Tropico coconut cream”?
 - g. Fa’ailoa mai vaega e tolu o le faasalalauga.

STP
World leading manufacturer of Canned Coconut Cream or Milk. Also manufactures a wide range of exotic Coconut and Tropical Products.

P.O. Box 1550, Apia, Samoa
Phone: 21 535 Office
Phone: 22541 Production
Facsimile: (0685) 23 032

SAMOA TROPICAL PRODUCTS
MANAGED BY: M & V ENTERPRISES LIMITED

AVE SE OSO MO AU MALO ASIASI MAI I SAMOA

SAMOA Tropico coconut cream

PE'EPE'E LOLOLO gaosia i Samoa Numera 1 i le Taumafa

NET WEIGHT

Aisea e te toe popole ai i se peepē lololo mo Taumafa? Ua le ese le 'Samoa Coconut Cream' ma le popo mai Samoa. Maua i soo se Faleoloā i soo se vaipanoa o le lalolagi. Lagolago ia Samoa ma ana Oloa.

SAMOA coconut cream
PREMIUM QUALITY
NET 400 ml

Fa'atinoga 5

La'asaga lonatolu: Iloilo le loloto o feso'ota'iga i auala fa'asalalau

O le lonatolu o la'asaga o le iloilo o tulaga loloto o feso'ota'iga i ala faasalalau e pei: O ai olo'o faia feso'ota'iga i luga o ala faasalalau?; O ā 'autū o ia feso'ota'iga?; O ai olo'o fa'atatau i ai? O ai e faamanuiaina ai?; O ai ole'ā faiā'ina pe fa'aleagaina ai?; O ai e faia filifiliga i tulaga e fa'asalalauina?

- Galulue Ta'ito'alua. Toe va'ai i le fa'asalalau a le Polenisia ma fa'atalanoa a lua tali i fesili nei:
 - O ai e ana le Polenisia?
 - O le ā le 'autū o le fa'asalalau a le Polenisia?

- O ai tagata olo'o patino i ai le fa'atosina a le fa'asalalauga? E fa'apefea ona lua iloa?
- O ai e fa'amanuiaina pe 'ä talia e tagata le mana'oga o le fa'asalalauga?
- O ai e afaina pe 'ä lē taliaina e tagata le mana'oga o le fa'asalalauga?
- Aiseä ua lē tāloina ai e le fa'asalalauga isi tagata femalagaa'i?
- Fa'amata e mafai e se isi kamupani va'alele i Sāmoa, ft. Sāmoa Air, ona fa'aaogā le fuaitau lea "LE AVE FUA A LOU ATUNU'U"? Aiseä?

Fa'atinoga 6

Tapena se fa'asalalauga o se tala

1. Galulue ta'ito'atasi.
2. Tapena sau fa'aaliga matamata tetele (poster) e fa'alauiloa se tasi o tala na 'e faitau ai i le Tusi Lua a le Gagana Sāmoa ft. Maunu Mai Loimata o 'Apaula; O La ma Malaga ma La'u Pua'a; Fagotaga; po o se isi tala ua 'e filifilia. E tatau ona e mātauina tulaga nei i lau fa'aaliga matamata tetele:
 - Fa'aaogā le pepa o le A4 (tutusa ma le laupepa o tusi a le Gagana Sāmoa).
 - Tulafono o le vaetolu.
 - Ulutala.
 - O se fuaitau pu'upu'u e fa'amatala ai le 'autū o le tala.
 - O se ata e fa'amatala ai se tulaga tāua o le tala.
 - Fa'aaogāina o lanu.
 - O lou igoa i le itū e tatau ona i ai le tagāvai.
 - Ia lelei le fa'aaogāina o avanoa i le pepa.
3. Fa'aali a tou fa'aaliga matamata tetele (posters) i se puipui o le tou potu.
4. Fa'atalanoa le fa'ataunu'uina o galuega sa atofaina.

Āutalaga 3: SA'ILI'ILIGA

ĀLĀFUA MA FA'ANAUNAUGA IA 'AUSIA

Ālāfua

Fa'anaunauga ia 'Ausia

E tatau ona mafai e tamaiti ona:

GAGANA

Iloa feliua'i le gagana i le toe faaupu lea o fuaiupu ia tutusa ma le 'autū, ma mafai ona toe fausia se palakalafa po o se 'autū ia latou upu ma faaupuga.

A'OINA O LE GAGANA

Fa'aaogā auala talafeagai e fa'aleleia ai la latou tautala i tulaga 'ese'ese ft. faata'ita'i muamua i luma o isi tamaiti ma aumai ni a latou fautuaga; fa'amatala se 'autū ina ia manino ma sologa lelei i le 'aufa'alogologo; iloa ona faaaogā ni 'oto'otoga pupu'u e fai ma faavae o se tautalaga; faata'ita'i ona feliua'i faamatalaga ma toe faaupu ina ia logomalie ma talafegai ma manatu 'autū.

FAAMAUMAUGA MA
FETUFAA'IGA

Au'ili'ili ma malamalama i la'asaga o le sa'ili'iliga, fa'atautai se sa'ili'iliga
Aoao mai ni faamatalaga e fai ai se lipoti o se sa'ili'iliga

Fa'atinoga 1

Tāua o Sa'ili'iliga

1. Galulue ta'ito'atolu.
2. Faitau palakalafa e lua o i lalo.


O se isi o sini faavae o a'oga maualuluga ua faapea, "ia sogasogā tamaiti i le faafoeina e i latou o ni isi o ā latou lava a'oa'oga." O lona uiga, o le'ā fa'afoe e i latou se galuega e amata i le faataatia o ni fuafuaga, filifili auala e fai ai, faatino, mātatau po o faape'i ona fai, ma iloilo se taunuuga. O ni fa'ata'ita'iga o galuega e mafai ona faafoe e tamaiti e iai le faia o se sailiiliga i se matā'upu, o talanoaga fa'afinauga, o galuega e felagolagoma'i ai ma isi tamaiti i ni vaega laiti, faatino se ata, pese, siva mf. E avea le faafoe e tamaiti o ni isi vaega o lo latou a'oa'oina, ma auala e filigā ma galuea'iina ai o latou mafaufau. Ole'ā iā i latou le faitalia e faia ai fuafuaga, ma fa'aiuga i tulaga e tataua ona fai, aemaise le toe iloilo pe na faapefea ona taunuuga. O nei tulaga uma e atinae ai le sogasogā o o latou mafaufau, ma lē ola faalagolago ai pea i faiā'oga. Ole'ā avea fo'i lea ma avanoa e atina'eina ai ni isi o tomai e mo'omia i o latou olaga faigaluega, ma olaga i totonu o aiga.

A faafoe e tamaiti ni isi o a latou a'oa'oga latou te:

- filifili se matā'upu.
- filifili faanaunauga ia ausia.
- filifili auala e faataunuu ai.
- saili ma faamaopoopo punaoa o moomia.
- filifili pe faapefea ona folasia galuega ua mae'a.
- mātatau faanaunauga ua ausia.
- iloilo le faataunuuina o galuega.

(Tusia i le: Fa'aaogāina o le *Ta'iala mo le A'oa'oina o le Gagana Sāmoa Mo A'oga Maualuluga i Sāmoa*: Fa'asinoala mo Faiā'oga: itulau 8–9).

3. Fa'atalanoa manatu 'autū o palakalafa i le velo'aso lea o le tou vaega i se faapogaleveleve faapea:



4. Tautala i le 3,2,1 minute. Auaua'i le tou vaega e faamatala tāua o sailiiliga mo le 3 minute i le tou vaega, 2 minute i se isi vaega, ma le 1 le minute i se isi fo'i vaega. O lona uiga o le faamatala lava e tasi e tautala mo le 3, 2, 1 le minute ae sui le vaega e faamatala i ai. A uma ona sui lea o le faamatala ma faapena ona faasolosolo ai mo le 3, 2, 1 le minute i vaega ese'ese.

5. Toe fo'i i le tou vaega to'atolu. Talanoa le tou vaega i tulaga nei o le faatinoga:
- O ā ni eseese o le sologa lelei o lau faamatalaga mai le 3 minute i le 2 minute, i le 1 le minute?
 - O ā ni matā'upu tou te faapoopoina i le tou faapogaleveleve?

Fa'atinoga 2

Fa'amasani i la'asaga o le sailiiliga

1. Talanoaga: Fafaguina o ni tulaga ua tou iloa.
 - O le ā le sailiiliga?
 - O a ni ona tāua? Aiseā e fai ai?
 - E faapefea ona faatino?
2. Faamasani i vaega o le sailiiliga. Taga'i i le Tusi Muamua o le Tausaga 9:
 - Vaevae i vaega ta'ito'alima.
 - Faitau ta'ito'atasi lēleoa itulau 47/48. Mātau manatu 'autū.
 - Faanumera vaega taitasi ia tofu le tamaititi ma lana numera mai le 1 i le 5.


O galuega nei a numera taitasi:

 1. Faataatia se ata mo le sailiiliga.
 2. Aoao ma faamaumau mau.
 3. Auiliili mau – fetuuna'i, felafolafoa'i ma faavasega mau.
 4. Faauigaga o ata ua alia'i mai i le sailiiliga – aotele mau.
 5. Lipoti o le sailiiliga.
3. Fetufaa'iga 1 – Malamalama i laasaga o le sailiiliga:
 - Galulue i vaega ua faanumeraina. O lona uiga o numera tasi uma e galulue faatasi, ma faapena i numera taitasi uma.
 - Faatalanoa le laasaga o le sailiiliga ua i le tou vaega. E tatau ona tou malamalama i tulaga nei:
 1. Galuega faatino o le laasaga ua iā outou.
 2. O ni tāua o lena laasaga.
 3. O ni faata'ita'iga.
4. Fetufaa'iga 2 – Malamalama i laasaga o le sailiiliga:
 - Toe fo'i i le tou vaega na i ai muamua.
 - Faamatala la'asaga o le sailiiliga sa nafa ma le tagata. Amata mai i le tagata sa iai le numera tasi.

5. Tu'ufa'atasiga a le Vasega:

O ā la'asaga o le sa'ili'iliga? Va'ai i le ata o le sailiiliga a o faamatala e le faiā'oga. Tusi ni faamatalaga faaopoopo i lau ata.

O vāega o le sa'ili'iliga e mafai ona fa'aata fa'aapea:



Fa'atinoga 3 La'asaga 1: Fuafuaga ma faata'imuaga

O Fuafuaga ma Faata'imuaga o le sa'ili'iliga, ua aofia ai galuega nei:

- filifili se matā'upu.
- filifili se 'autū.
- faataatia fesili ta'imua.
- tapena auala e aoao ai mau.
- faapolokalame taimi.

1. Galulue ta'ito'alima e faatino le la'asaga muamua o le sailiiliga.
2. Talanoa i le fesili lea: O ā ni matā'upu tatou te faia i ai se sailiiliga? Velo 'aso vaega ta'itasi iā latou pepa ma lipoti i le vasega. Faapipii uma pepa i le puipui o le fale.
4. Tagai i le lisi o matā'upu sa velo 'aso i ai vaega ta'itasi.
5. Filifili ni matā'upu ma 'autū e talafeagai ona fai i ai ni sa'ili'iliga a le vasega i le piliota e tasi.
6. Auiliili tulaga e ono sa'ili'ilia.


7. Fai ni fesili e fa'ata'imuaina le sa'ili'iliga.

8. Fa'atalanoa fesili, tali e mo'omia, ma auala e maua ai faamatalaga.

O le fa'atinoga leni o le la'asaga muamua e se vaega o le 9–1 a le A'oga Maualuga i Leififi.


■ **Filifili se matā'upu**

O velogā 'aso nei a le vaega i ni matā'upu e ono fai i ai se sa'ili'iliga.



■ **Filifili se 'autū**

Sa filifili le matā'upu o le soifua mālōlōina e fai i ai se sa'ili'iliga ona toe velo 'aso lea o le vaega i le matā'upu e sa'ili ai se 'autū ft.



Na filifilia e le vaega lea o le vasega o le 9–1 le **Fa'amalositino** e avea ma 'autū e fai i ai la latou sa'ili'iliga. Olo'o fa'aalia i la latou velogā'aso o i luga le fa'alauteleina o ni tulaga o le Fa'amalositino e ono sa'ili'ili i ai.

■ **Fa'ata'atia ni fesili tetele e fa'ata'imua ai le sa'ili'iliga**

E tāmāu i fesili le 'umi, loloto ma le lautele e o'o i ai le sa'ili'iliga. O fesili nei sa fesoasoani i le vaega a o fa'atalanoa ni fesili e fa'ata'imua ai la latou sa'ili'iliga i le 'autū o le Fa'amalositino.

Matā'upu	Fesili fesoasoani i veloga'aso mo le sa'ilia o ni fesili e ta'imua ai le sa'ili'iliga	O fesili nei sa maua i le veloga'aso a le vaega	Fesili e fa'ata'imuaina le sailiiliga
Soifua Mālōlōina	1. Aiseā ole'ā sa'ili'ili ai lea matā'upu?	1. O le ā le tāua o fa'amalositino?	1. O ā tulaga olo'o iai fa'amalositino a le vasega o le 9-1 i le A'oga Maualuga i Leififi?
'Autū filifilia Fa'amalositino	2. O ā ni tulaga ua tatou iloa i lea matā'upu? 3. O ā ni tulaga tatou te fia iloa? 4. O ā ni o tatou manatu i le matā'upu? 5. O le ā le fa'afitauli? 6. Fa'amata o ā ni mafua'aga? 7. Fa'amata o ā ni tulaga e fōia ai? 8. Fa'amata o le ā se i'uga o le sa'ili'iliga? 9. O ā ni fesili tatou te fia maua ni tali?	2. O ā taimi e fai ai fa'amalositino a le 9-1? 3. O ā a'afiaga o lou tino? 4. O ā ni taumafa e te fa'aaogāina pe afai olo'o e fa'amalositino? 5. O ā ni a'afiaga o le tino pe 'ā fa'amalositino? 6. O ai o lou 'āiga e fai fa'amalositino? 7. O fea e fai ai fa'amalositino? 8. O ā ou lavalava e fai?	2. O le ā le tāua o le fa'amalositino i le 9-1?

Sa toe faatalanoaina fesili nei ma faavasega i ni vaega tetele ua alia'i mai ft: tulaga o le faia o fa'amalositino, ma tāua o fa'amalositino. E i ai fo'i fesili sa lē fa'aaogāina ona sa fai si sala 'ese mai vaega ia e lua.

O fesili ta'imua na fafau mai i le tu'ufa'atasiga o fesili sa velo'aso i ai tamaiti. O se sa'ili'iliga muamua lenei a le vasega ma e utiuti le taimi na faatulagaina (2 vaiaso). O lea na filifilia ai tamaiti o le vasega lava latou o le 9-1 e patino i ai le sa'ili'iliga a o fa'amasani i latou i le fa'atinoga o le sa'ili'iliga.

Na māe'a ona velo'aso le vaega i fesili ona iloilo lea o le talafeagai o fesili e ta'imua ai le sa'ili'iliga. O fesili ta'imua e tāua tele ona e tulimata'i uma i ai galuega o le sa'ili'iliga. O ni fesili fo'i e aotele i ai ni tulaga olo'o fia iloa nai lo le va'ai i se vaega se tasi. O ni fa'ata'ita'iga, o ni isi o fesili mai le veloga'aso a le vaega ua fa'apito i ni vaega ta'itasi pei:

- O ā taimi e fai ai fa'amalositino a le 9–1?
- O ā ni taumafa e te fa'aaogāina pe afai olo'o e koleni fa'amalositino?
- O ā ni a'afiaga o le tino pe 'ā fa'amalositino?
- O fea e fai ai fa'amalositino?
- O ā ou lavalava e fai?

A aotele vaega uma nei e mafai ona aofia i le fesili:

- O ā tulaga olo'o iai fa'amalositino a le vasega o le 9–1 i le A'oga Maualuga i Leififi?


O fesili olo'o fa'apito i ni vaega ta'itasi o le 'autū e mafai ona ta'ua o ni fesili tatala, auā e tatalaina pe fa'alautele e ia fesili le fesili ta'imua.

■ **Tapena auala e aoao ai mau**

O mau e tali ai fesili o se sa'ili'iliga e mo'omia ona iai tulaga nei:

- e tāua ona mā'oti ma lē fa'alua fesasi mau. O lona uiga e mautinoa lē na aumai ai le mau, le feso'ota'iga o mau ma fesili olo'o talia.
- e talafeagai mau ma fesili ta'imua.
- ia lava ni mau ina ia manino mai uiga po o tulaga o aga'i i ai po o mafuli i ai tali, tulaga va'aia, po o manatu faaalua. O lona uiga o se sa'ili'iliga ua aofia ai na'o ni tagata se to'asefulu ole'ā faigata ona maua ai se ata o le tulaga olo'o fia sa'ilia.

Fesili ta'imua	Fesili fesoasoani	Auala e ao ai mau
<p>1. O ā tulaga olo'o iai fa'amalositino a vasega o le 9–1 i le A'oga Maualuga i Leifiifi?</p>	<p>1. Pe fa'apefea ona mau ni fa'amatalaga ma ni mau e taliina fesili olo'o fa'ata'imua ai le sa'ili'iliga? ft. mau tu'usa'o, mau tusitusia, mau olo'o va'aia mf.</p>	<p>O auala 'ese'ese e aoao ai mau o se sa'ili'iliga ua aofia ai:</p> <ul style="list-style-type: none"> ■ le va'ava'ai ma mātau tulaga o iai ■ le faitau i ni mau ua tusitusia ■ le fa'atalanoa o ni tagata ■ le fa'aaogāina o ni pepa fesili ■ le pu'eina o ni ata vito
<p>2. O le ā le tāua o le fa'amalositino i le 9–1?</p>	<p>2. E fa'apefea ona aoao mau? E fa'apefea ona fa'amaumau fa'amatalaga ma mau?</p> <p>3. O ai e ana ia mau? O le ā le itū po'o se va'aiga o lo'o 'aumi ai nei mau?</p> <p>4. O le ā le talafeagai o ia mau ma le 'autū o le sa'ili'iliga?</p> <p>5. E fa'apefea ona fa'amaumau fa'amatalaga ma mau?</p>	<p>E fuafua auala e fa'aaogāina i fesili ta'imua, taimi e fa'atino ai le sa'ili'iliga, ma le loloto e o'o i ai le sa'ili'iliga.</p>



Na filifilia Pepa Fesili e ao ai mau o le sa'ili'iliga. O tamaiti o le vasega na filifili e taliina pepa fesili.

■ **Pepa Fesili**

FAAMALOSITINO

Fesili Ta'imua:

1. O ā tulaga o iai faamalositino a vasega o le 9–1 i le A'oga Mauluga i Leifiifi?
2. O le ā le tāua o faamalositino i le tausaga 9–1?

E mafai ona iloa ai ni uiga e patino i teine po o tama

1. Fa'asa'o le pusa talafeagai.

Tama

Teine

E tatalaina le fesili ta'imua numera 2

2. O le ā le tāua o le faamalositino ia te oe? Faanumera lau tali mai le 1 = pito sili ona tāua.

- ___ e faaitiitia ai le puta
- ___ e faamalosi ai le tino
- ___ e lava ai le manava
- ___ e tumau ai le talavou
- ___ e maua le mafutaga ma uō
- ___ e mataala ai le mafaufau
- ___ e aveese ai le 'ivā

E faigofie ai ona iloa tulaga olo'o mafuli i ai le fa'atāua a le vasega

O le lisi o tali e filifili e tagata e vave ai ona fa'avasega mulimuli

3. O ā faamalositino e te faia?

- ___ savali i se taimi faapitoa
- ___ tamo'e
- ___ vasega faapitoa
- ___ ta'aloga a se 'au ta'alo
- ___ ta'aloga i taimi o malologa
- ___ galuega fai i le 'āiga ft. ma'umaga, umu, ..
- ___ o se isi _____

E tali ai le fesili ta'imua 1. E mafai fo'i ona iloa ai se faamaoniga o tali o le fesili lonalua

E tali ai le fesili ta'imua 1. E mafai fo'i ona avea ma mau o le fesili ta'imua lonalua

4. E fa'afia ona fai au faamalositino i vaiaso ta'itasi? Faasa'o le tali e talafeagai.

- lalo ifo o le faatasi i le vaiaso
- va o le faatasi ma le faalua i le vaiaso
- va o le faalua ma le faatolu i le vaiaso
- va o le faatolu ma le faafa i le vaiaso
- va o le faafa ma le faaono i le vaiaso
- aso uma o le vaiaso.

Ona o le utiuti o le taimi o lea sa filifili ai na'o ni fesili se 4 e tatalaina fesili ta'imua.

Fa'atinoga 4 **La'asaga 2: Aoa ma fa'amaumau fa'amatalaga po o mau**

1. Tufa pepa fesili i le vasega e fa'atumu. E lē mo'omia le tusia o igoa i pepa.
2. Ao mai pepa fesili.

Fa'atinoga 5 **La'asaga 3: Au'ilili ma fa'avasega mau**

O le vaega leni e mo'omia ai ona faavasega ma auilili mau ua maua mai i tali o pepa fesili. O lona uiga e fefulisa'i, fetu'una'i, fefulisa'i ma fa'avasega fa'amatalaga ma mau i ni vaega talafeagai ma le 'autū o le sa'ililiga. O fesili fesoasoani ma galuega fa'atino mo au'ililiga ma fa'avasegaga olo'o avatu i pusa ia:

Fesili fesoasoani	La'asaga o le sa'ililiga	Galuega fa'atino
<ul style="list-style-type: none"> ■ E fa'apefea ona tatou fa'avasegaina fa'amatalaga ma mau ua maua mai? ■ E iai ni tulaga e tutusa pe 'ese'ese ua aliā'i mai i fa'amatalaga? ■ O le ā se fa'atusa o fa'amatalaga po'o mau ua tatou maua ma isi tulaga fa'apea? ■ O ā ni tulaga o feso'ota'i ai fa'amatalaga ma mau ua tatou ao maia? 	<p>III AU'ILI'ILI MA FA'AVASEGA FA'AMATALAGA MAU</p> <p>Au'ilili, fetu'una'i, fefulisa'i ma mau fa'avasega fa'amatalaga ma i ni vaega talafeagai ma le 'autū o le sa'ililiga.</p>	<ul style="list-style-type: none"> ■ Filifili ni vaega tetele e fa'avasega i ai fa'amatalaga ma mau. ■ Mātau, fa'amaopopo ma fa'avasega mau i vāega ua filifilia. ■ Fa'amaopopo ma tu'ufa'atasi tulaga ua aliā'i mai i ni siata, kalafi, mf. ■ Fetufaā'i ma fefa'asoā'i manatu i ata ua aliā'i mai.

Sa fa'avasega tali o fesili ta'itasi i vaega na mana'omia i le fesili, ma faitau le aofa'i o tali i ia vaega e iloa ai po o fea o mafuli i ai tali a le vasega. Olo'o avatu i pusa ia fa'avasegaga ma aofa'i o tali i fesili ta'itasi.

Fesili 1: Itu'aiga

E to'asefulu tama na taliina le pepa fesili ae to'aluasefulutolu teine.

Fesili 2: Tāua o fa'amalosi tino i tamaiti o le 9–1


Na faitau le aofa'i o tamaiti na pito i sili ona fa'atāuaina tāua ta'itasi sa tā'ua i le fesili. O le fa'amaumau olo'o avatu i le pusa fa'apea:

Pusa o Fuainumera 1: Tāua o faamalositino na fa'asilisili e le Vasega a le 9-1 i le A'oga Maualuga Leifiifi

Tāua	Aofa'i	%
Faaitiitia ai le puta	9	27.3
Faamalosi ai le tino	19	57.6
Lava ai le manava	2	6.1
Tumau ai le talavou	0	0.0
Mafutaga ma uō	0	0.0
Mataala ai le mafaufau	1	3.0
Ave'ese ai le 'ivā	2	6.1
Aofa'i	33	100.0

Na fa'akalafi fa'amatalaga olo'o i le pusa o fuainumera ona maua ai lea o se ata fa'apea:

Kalafi 1: Tāua o faamalositino na fa'asilisili e le Vasega a le 9-1 i le A'oga Maualuga Leifiifi



Fesili 3: Fa’amalositino e faia e tamaiti o le 9–1 i le A’oga Maualuga i Leififi.


O fa’amalositino nei na ta’u mai e le 9–1 latou te faia:

Pusa fuainumera 2: Fa’amalositino e faia e tamaiti o le 9–1 i le A’oga Maualuga i Leififi

Itū’āiga fa’amalositino	Aofa’i o tamaiti e faia	Pasene (/33)
savali	12	36.4
tamo’e	18	54.5
vasega fa’apitoa	9	27.3
taalo i se ‘au ta’alo	11	33.3
ta’aloga i mālōlōga	10	30.3
galuega i ‘āiga	12	36.4

A fa’akalafi fa’amatalaga o i luga ona fa’apea lea:

Kalafi 2: Itū’āiga fa’amalositino e faia e le Vasega a le 9–1 i le A’oga Maualuga Leififi




Fesili 4: Aofa'i o taimi i le vaiaso e fa'amalositino ai tamaiti o le 9-1

Pusa fuainumera 3: Aofa'i o taimi e fai ai fa'amalositino

Fa'afia i le vaiaso	Aofai	Pasene
<1 i le vaiaso	2	6.1
1 i le 2	5	15.2
2 i le 3	4	12.1
3 i le 4	2	6.1
4 i le 5	2	6.1
aso uma	18	54.5

Kalafi 3: Fa'afia ona fai fa'amalositino i le vaiaso




Fa'atinoga 6 La'asaga 4: Aotele manatu, faauiga ata ua alia'i mai

A uma ona tu'ufa'atasi i'uga i pusa fuainumera ma ni kalafi, ona va'ai loa lea i ata olo'o alia'i mai ma fa'auiga. O le la'asaga lenei e taaofa'i ai manatu, ma uiga ua alia'i mai i mau.

O fesili fesoasoani ma galuega fa'atino mo fa'auigaga olo'o avatu i pusa ia:

Fesili fesoasoani	La'asaga o le sa'ililiga	Galuega fa'atino
<ul style="list-style-type: none"> ■ O ā ni fa'ai'uga tatou te faia i ni ata ua aliā'i mai? ■ O ā ni a tatou fa'auigaga i ni tūlaga ua aliā'i mai? ■ Ua sui so tātou iloa i le matā'upu ona o ata ua aliā'i mai? ■ O le ā se fa'ai'uga e mafai ona fai e tali ai i fesili sa fa'ata'imua ai le sa'ililiga? ■ O ā ni mau patino e lagolagoina la tatou fa'a i'uga? 	<p>IV. FA'AUIGAGA O ATA UA ALIĀ'I MAI</p> <ul style="list-style-type: none"> ■ Fai ni manatu aotele e talafeagai ma i'uga ua aliā'i mai. ■ Fa'amalamalama tulaga o tutusa pe 'ese'ese ai ni mea ua aliā'i mai. ■ Fa'amatala tulaga o feso'ota'i ai fa'amatalaga ma mau. ■ Fa'amautinoa le sa'o po o le sesē o ni manatu sa iai i le amataga. ■ 'Aumai ni fautuaga pe 'ā talafeagai. 	<ul style="list-style-type: none"> ■ Tāaofa'i manatu i ni aotelega. ■ Tusi manatu e fa'amatalaina ata olo'o 'aumai i siata, kalafi ma fa'afeso'ota'i i fesili. ■ Tali fesili sa fa'ata'imua ai le sa'ililiga.

O fa'amatalaga nei ma fa'auigaga a le vaega na faia le sa'ililiga i **Fa'amalositino a le 9-1.**



Fa'amalositino e faia e le 9–1

Olo'o fa'aalia i le Kalafi 2, le fa'asologa o fa'amalositino e faia e tamaiti o le vasega. E pito i sili ā ona to'atele tamaiti e fa'amalositino i le tamomo'e (55%), soso'o atu ai le savavali, ma galuega fai i 'āiga (36%), 'au ta'alo a le a'oga ft. lakapi, netipolo (33%), ta'aaloga fa'asamasamanoa (30%), ma le 'auai i ni vasega fa'amalositino fa'apitoa (27%). O lona uiga e mafuli fa'amalositino a tamaiti o le 9–1 i tulaga masani o le soifuaga e pei o le momo'e, savali ma fe'au a le 'āiga. Atonu o tulaga ia e lē mana'omia tele ni tapenaga ma ni taimi fa'apitoa e faia ai. O le 33% o le vasega olo'o auai i ni 'auta'aalo a le a'oga ae manaia fo'i pe 'ana fa'apea e o'o atu le tulaga lea i se 40% o le vasega.

E fa'afia ona fai fa'amalositino

O le Kalafi 3 olo'o iloa taimi e fa'aalu e tamaiti iā latou fa'amalositino. E pito i sili ona to'atele tamaiti na fai mai e fai i aso uma ā latou fa'amalositino. Pe tusa ma le 56% po o le sili la'itiiti atu lava i le afa o le vasega, e toa'aga tele i le fa'amalositino. O le vaega olo'o soso'o atu ai lo latou taimi fa'aalu i fa'amalositino o latou ia ua na'o le faatasi i le faalua ona fai fa'amalositino i le vaiaso (15%), ma le vaega e fa'alua i le fa'atolu ona fai fa'amalositino i le vaiaso (12%). E ui olo'o i luga atu teisi o le 'afa o le vasega e fa'amalositino i aso uma, ae olo'o feoloolo lava fo'i le aofa'i o le vasega olo'o utituti taimi fa'aaogā i fa'amalositino. Pe tusa ma le 31% o le vasega e i lalo ifo o le fa'atolu i le vaiaso ona fai fa'amalositino (15% + 12% + 6%). O lona uiga toetiiti lava tasi o vaetolu o le vasega e lavea i le tulaga lea.

1. Galulue ta'ito'alua.
2. Ta'u mai le fa'avasegaga o palakalafa olo'o i luga.
3. Ta'u mai galuega a fuaiupu ta'itasi olo'o fai i totonu o palakalafa.

O le lipoti o le sa'ili'iliga e iai ona vaega fa'atulagaina:

1. Fa'atomuaga (Introduction):

Fa'amatala le tāua o le 'autū, mafua'aga o le filifilia o le 'autū.

2. Ata o le Sa'ili'iliga (Design).

Fa'amatala tulaga nei:

- Fesili ta'imua.
- Fesili lagolago po o ni fesili e tatala ai fesili ta'imua.
- Auala na fa'aaogā e ao ai fa'amatalaga ma mau.
- Taimi na fa'ataunu'u ai.
- Tagata sa maua mai ai mau po o tali.
- Auala na fa'avasega ma au'ili'ili ai mau.

3. I'uga.

Fa'amatala i'uga o le sa'ili'iliga ft. o ata sa alia'i mai.

Tali fesili sa ta'imua ai le sa'ili'iliga. Fa'aaogā siata, kalafi m.f. e lagolago ma fa'alautele ai.

4. Aotelega.

Fa'amatala ni uiga, mafua'aga, a'afiaga o i'uga o sa'ili'iliga.

Aumai ni fautuaga pe 'ā talafeagai.

5. Fa'ai'uga.

Tāaofa'i le sa'ili'iliga mai lona 'autū, fesili ta'imua, mau ua maua ma o lātou tā'ua i le 'autū.

O ni fesili fesoasoani ma galuega fa'atino olo'o avatu i pusa ia.

Fesili fesoasoani	La'asaga o le sa'iliiliga	Galuega fa'atino
<ul style="list-style-type: none"> ■ E fa'apefea ona folasia le fa'agaoioiga ma i'uga o le sa'iliiliga? ■ E fa'apefea ona tatou fa'aaogā i'uga o le sa'iliiliga mo le fa'alelei o o tatou: si'osi'omaga, aiga, nu'u, a'oga, ekalesia, gagana m.f.? 	<p>V. TĀĀOFA'Ī I SE LIPOTI</p> <ul style="list-style-type: none"> ■ Fai se lipoti manino e tamau ai fa'ai'uga o le sa'iliiliga. ■ Ia talafeagai le fa'avasegaga o le lipoti ma le 'autū, 'aufaitau & fa'alogologo. ■ Tapena siata, kalafi ma isi teuteuga mo le lipoti po'o se seminā. ■ Lisi galuega fa'atino e ono faia ona o i'uga o le sa'iliiliga. ■ Fa'ailoa e na lagolagoina, ma tusi si'i i auala taualoa. 	<ul style="list-style-type: none"> ■ Tusia se lipoti ia iai vaega nei. ■ A'oa'o tamaiti i le faia o aotelega ma vaega ta'itasi o le lipoti. Fa'aaogā ni lipoti ua mātā e faitau ma au'ili'ili e tamaiti. ■ Tapena tamaiti mo le faia o ni seminā. ■ Faia ni fa'aaliga o galuega (display).

O le lipoti lenei a le vaega na fa'ataunu'uina le sa'iliiliga.

1. Galulue ta'ito'atasi.
2. Faitau ma mātā vaega 'ese'ese o le lipoti.
3. Au'ili'ili le fa'avasegaga o manatu olo'o i le Aotelega ma le Fa'ai'uga. Ta'u mai le fa'asologa o fuai'upu i le palakalafa ma ō latou tāua.
4. Fa'atalanoa e le vasega atoa le feso'ota'iga o vaega ta'itasi o le lipoti ft.
 - O ā tāua o fesili ta'imua i le fa'amaopoopoina o le sa'iliiliga atoa?
 - O le ā le 'ese'esega o le fa'amatalaina o **I'uga** o le sa'iliiliga, ma le **Aotelega**?
 - O le ā le galuega a le **Fa'ai'uga** olo'o fai?

LIPOTI O LE SA'ILI'ILIGA

FA'AMALOSITINO A LE VASEGA O LE 9-1 I LE A'OGA MAUÄLUGA I LEIFIIFI

Saunia e: Suivu Mah Yuen, Raymond MCarthy, Michael Fiso, So'oupu Lameko, Frank Uhrley, Bursie Niulesa

1.0 Fa'atomuaga

O le 'auga o le sa'ili'iliga o tulaga o iai fa'amalositino a le vasega o le 9-1 i le A'oga Mauäluga i Leifiifi. Ua fa'atāuaina le fa'amalositino o se 'auala e fō'ia ai le tele o fa'ama'i e pei o le suka, ma'i fatu m.f., i le tele o polokalame fa'asalalau a le Matagaluega o le Soifua Mälölöina. O le ala lea na filifilia ai le 'autū ona o lona tāua i le soifua mälölöina ma olo'o fia iloa po o fa'ape'i fa'amalositino a le vasega o le 9-1.

2.0 Ata o le Sa'ili'iliga

■ Fesili ta'imua.

E lua ni vaega o le fa'amalositino a tamaiti sa mafuli i ai le sa'ili'iliga: o tulaga o le faatinoga, ma tulaga o le fa'atāuaina. O fesili tetele nei e lua na ta'ita'iina le sa'ili'iliga:

1. O ā tulaga o i ai fa'amalositino a le vasega o le 9-1 i le A'oga Mauäluga i Leifiifi?
2. O le ā le tāua o fa'amalositino i le tausaga 9-1?

■ Fesili lagolago.

O fesili lagolago nei sa fa'aaogā e tatala atili ai fesili ta'imua:

1. O le ā le tāua o le fa'amalositino ia te oe? Faanumera lau tali mai le 1=pito sili ona tāua.
2. O ā fa'amalositino e te faia?
3. E fa'afia ona fai au fa'amalositino i vaiaso ta'itasi?

■ Auala na fa'aaogā e ao ai mau.

Sa fa'aaogā se pepa fesili na saunia e ao ai mau mai tamaiti o le 9-1 (va'ai i le Fa'atinoga 3: La'asaga 1: Fuafuaga ma faata'imuaga). Pe tusa ma le 2 vaiaso sa fa'atino ai le sa'ili'iliga i le taimi o le Gagana Sāmoa.

■ Fa'avasegaga ma au'ili'iliga.

O tali o fesili ta'itasi mai tamaiti uma sa fa'amaopoopo i ni siata, ona faitau ai lea o le aofa'i o tali sa maua i vaega 'ese'ese o fesili. O se fa'ata'ita'iga o le fesili lagolago muamua:

O le ā le tāua o le fa'amalositino ia te oe? Faanumera lau tali mai le 1=pito sili ona tāua.

_____ e faaitiitia ai le puta.

- _____ e faamalosī ai le tino.
- _____ e lava ai le manava.
- _____ e tumau ai le talavou.
- _____ e maua le mafutaga ma uō.
- _____ e mataala ai le mafaufau.
- _____ e aveese ai le ivā.

Na faitau le aofa’i o numera 1, 2, 3, 4, 5, 6, 7 na ave i tāua ta’itasi i le lisi, ona tu’ufa’atasi lea i se kalafi le aofa’i o numera 1 na maua e tāua ta’itasi. O iina na iloa ai tāua na fa’asilisili ona mafuli i ai manatu o le vasega (va’ai i le Fa’atinoga 5: La’asaga 3: Au’ili’ili ma Fa’avasega Mau, Kalafi 1). O fesili lagolago lonalua ma le lonatolu na fa’avasega ma fa’aopoopo tali na aumai i vaega ta’itasi o le fesili ma maua ai aofa’i olo’o avatu i le Kalafi 2 ma le Kalafi 3.

3.0 I’uga o le Sa’ili’iliga

O i’uga o le sa’ili’iliga olo’o fa’amatala i lalo o ‘autū o fesili lagolago ta’itasi.

Tāua o fa’amalositino

E lua ni tāua o fa’amalositino sa fa’asilisilia e tamaiti o le 9–1 i le A’oga Maualuga a Leififi. Olo’o manino mai i le Kalafi 1 (itulau 63) pe tusa ma le 58% o le vasega na fa’amamua le tāua o le fa’amalositino ona e malosī ai le tino; ona soso’o ai lea ma le tāua o le fa’amalositino ona e fa’aitiitia ai le puta. O le 27% o le vasega na fa’atāuaina le tulaga lea. A tu’ufa’atasi tulaga nei e lua, o lona uiga o le 85% o le vasega ua fa’atāuaina le fa’amalositino ona e malosī ai le tino ma e fa’aitiitia ai le puta. Ua lē to’atele ni isi o le vasega na fa’atāuaina le fa’amalositino i le lava ai o le manava, tumau ai le talavou, mataala ai le mafaufau, ma aveesea ai le ivā. Atonu o tulaga ia e pei o le lava o le manava, aveesea le ivā, mataala le mafaufau e maua pe ‘ā malosī le tino ma fa’aitiitia le puta.

Fa’amalositino e faia e le 9–1

Olo’o fa’aalia i le Kalafi 2 (itulau 64), le fa’asologa o fa’amalositino e faia e tamaiti o le vasega. E pito i sili ā ona to’atele tamaiti e fa’amalositino i le tamomo’e (55%), soso’o atu ai le savavali, ma galuega fai i ‘āiga (36%), ‘au ta’alo a le a’oga ft. lakapi, netipolo (33%), ta’aaloga fa’asamasamanoa (30%), ma le ‘auai i ni vasega fa’amalositino fa’apitoa (27%). O lona uiga e mafuli fa’amalositino a tamaiti o le 9–1 i tulaga masani o le soifuaga e pei o le momo’e, savali ma fe’au a le ‘āiga. Atonu o tulaga ia e lē mana’omia tele ni tapenaga ma ni taimi fa’apitoa e faia ai. O le 33% o le vasega olo’o auai i ni ‘auta’aalo a le a’oga ae manaia fo’i pe ‘ana fa’apea e o’o atu le tulaga lea i se 40% o le vasega.

E fa’afia ona fai fa’amalositino

O le Kalafi 3 (itulau 65) olo’o iloa ai taimi e fa’aalu e tamaiti iā latou fa’amalositino. E pito i sili ona to’atele tamaiti na fai mai e fai i aso uma ā latou faamalositino. Pe tusa ma le 56% po o le sili la’itiiti atu lava i le afa o le vasega, e toa’aga tele i le fa’amalositino. O le vaega olo’o soso’o atu ai lo latou taimi fa’aalu i fa’amalositino o latou ia ua na’o le faatasi i le faalua ona fai faamalositino i le vaiaso (15%), ma le vaega e fa’alua i le fa’atolu ona faamalositino i le vaiaso (12%). E ui olo’o i luga atu teisi o le ‘afa o le aofa’i o le vasega e fa’amalositino i aso uma, ae olo’o feoloolo lava fo’i le aofa’i o le vasega olo’o utituti taimi fa’aaogā i fa’amalositino. Pe tusa ma le 31% o le vasega e i lalo ifo o le fa’atolu i le vaiaso ona fai fa’amalositino (15% + 12% + 6%). O lona uiga toeitiiti lava tasi o vaetolu o le vasega e lavea i le tulaga lea.

4.0 Aotelega

- Ata aotele e tali ai fesili ta’imua
- Tali le fesili ta’imua
- O se isi ata ua ‘ese mai ai ae fa’atatau uma i fesili ta’imua

Ua alia’i mai i i’uga o le sa’ili’iliga olo’o iloa e le to’atele o le vasega o le 9–1, e tāua le fa’amalositino auā e malosi ai le tino ma e fa’aitiitia ai le puta. O le to’atele fo’i o le vasega ua molimau e fa’amalositino i le tamomo’e, savavali, fai fe’au a le ‘āiga, po o le auai i se ‘au ta’alo. **O lona uiga** e mafai ona fa’apea olo’o tulaga lelei le malamalama o tamaiti i tāua o le fa’amalositino, atoa ma le fa’agaioi o ō latou tino i tulaga masani o le olaga. A o se isi itū, a tu’u atu i se ata olo’o alia’i mai i le fesili lona tolu e uiga i taimi fa’aalu i fa’amalositino, ona iloa ai lea o se tulaga e ono fa’apopoleina ai. E ui olo’o i luga atu teisi o le ‘afa o le aofa’i o le vasega e fa’amalositino i aso uma, ae olo’o feoloolo lava fo’i le aofa’i o le vasega olo’o utituti taimi fa’aaogā i fa’amalositino. Pe tusa ma le 31% o le vasega e i lalo ifo o le fa’atolu i le vaiaso ona fai fa’amalositino. O lona uiga olo’o lelei le malamalama i tāua, olo’o fa’aaogā tulaga masani ma taugofie ona fai ai fa’amalositino, ae pe tusa ma le tasi o vaetolu o le vasega e lē o lava la latou fa’atino.

5.0 Fa'ai'uga

Sa fa'a'autū le sa'ili'iliga i le fia iloa po o fa'ape'i fa'amalositino a le vasega o le 9-1. O fesili sa fa'ata'imuaina le sa'ili'iliga o: (1) O ā tulaga o i ai faamalositino a le 9-1?, (2) O le ā le tāua o faamalositino i le vasega o le 9-1? Ua manino mai i le sa'ili'iliga le tulaga lelei o le malamalama o le 9-1 i tāua o le fa'amalositino, ma itu'āiga fa'amalositino latou te faia. Peita'i olo'o atagia mai fō'i le to'atele o le vasega e lē'o faifaipea ia fa'amalositino i se vaiaso, ae ua fa'atasi i le fa'alua pe faatolu fō'i i le vaiaso. Ua fautuaina mo le soifua mālōlōina le tāua o le faia o fa'amalositino i aso ta'itasi mo se taimi pe tusa ma le 'afa itulā. Ioe e tāua le fa'amalositino mo le malosi o le tino ma le fa'aitiitia o le puta, ae tāua fō'i ona faifaipea i lea aso ma lea aso.

Toe fa'aupu tali o fesili ta'imua

Toe fa'aupu le tāua o le 'autū i le soifua mālōlōina

Toe fa'aupu fesili ta'imua

Fa'atinoga 8 Fa'atino ni isi o La'asaga o Sa'ili'iliga: Fa'amatala l'uga, Aotelega

O se isi vaega o le vasega 9-1 a Leififi sa fai la latou sa'ili'iliga i manatu o le vasega i siva fa'aaganu'u. E le'i lava le taimi e fa'auma ai le fa'atinoga o ni isi vaega o la latou sa'ili'iliga. E tolu fesili ta'imua o le sa'ili'iliga ua fa'apea:

1. O ā ni tāua o siva fa'aaganu'u i manatu o le vasega?
2. O ā ni suiga o mātau e tamaiti ua alia'i mai i siva fa'aaganu'u?
3. O ā manatu o le vasega i foliga o se siva Sāmoa lelei?

Sa fa'aaogā se pepa fesili e sa'ili mai ai tali a le vasega.

Pepa fesili

1. O ā ni tāua o siva fa'aaganu'u? Fa'anumera faasolo mai i le 1 = pito sili ona tāua.

_____ e aogā e fa'agaoioi ai lou tino

_____ e faamanatu ai siva faasamoa moni

_____ ina ia fealofani tupulaga

_____ e faafiafia ai

2. O ā ni suiga ua alia'i mai i siva fa'aaganu'u i nei ona po?

3. O ā foliga o se siva Sāmoa lelei? Faatulaga mai 1=pito sili ona tāua.

1. _____

2. _____

3. _____

4. _____

5. _____

O le fa'avasegaga nei o tali a le vasega.

Tāua o siva fa'asāmoa i fa'avasegaga a le 9-1

Tāua	Aofa'i o le vasega na faamuamuaina tāua nei	%
Fa'agaoioi ai le tino	3	9
Fa'amanatu ai siva moni a Sāmoa	26	74
Fealofani ai tupulaga	3	9
Fa'afiafia	3	9
Aofa'i	35	100

1. Galulue ta'ito'alua.

2. Fa'akalafi e oulua fa'amaumauga olo'o i luga.

3. Fa'amatala i ni fuaiupu se tolu pe fa uiga o alia'i mai i tali a le vasega.

Suiga o siva fa'asāmoa ua mātauina e le vasega

Suiga	Aofa'i	%
Mou atu siva fa'asāmoa	7	23
Taga	11	37
Filogia ma siva a isi atunu'u	7	23
Teuga	3	10
Pese	2	7
Aofa'i	30	100

4. Galulue ta'ito'alua.
5. Fa'akalafi e oulua fa'amaumauga olo'o i luga.
6. Fa'amatala i ni fuaiupu se tolu pe fa uiga o alia'i mai i tali a le vasega.

Siva Sāmoa Lelei

	Aofa'i	%
Mata'ata'ata	12	40
Gaoioi	11	37
Teuga	4	13
Lelei le Taupou	3	10
Aofa'i	30	100

7. Galulue ta'ito'alua.
8. Fa'akalafi e oulua fa'amaumauga olo'o i luga.
9. Fa'amatala i ni fuaiupu se tolu pe fa uiga o alia'i mai i tali a le vasega.
10. Lipoti i le vasega.
11. Fa'atalanoa ma tu'ufa'atasi e le tou vasega le aotelega o le sa'ili'iliga lenei. Toe va'ai i le aotelega o le sa'ili'iliga i Fa'amalositino mo se fa'ata'ita'iga.

Fa'atinoga 9

Fa'atino ni isi o La'asaga o Sa'ililiga: Fa'avasega mau

O le sa'ililiga lenei e fa'atatau i talitonuga kerisiano. O le fesili sa fa'ata'imuaina le sa'ililiga e fa'apea:

Fesili Ta'imua:

(1) E faapefea ona faamatalaina le kerisiano e tamaiti o le 9-1?

O fesili lagolago sa fa'aaoga i se pepa fesili e tatala atili ai le fesili ta'imua e fa'apea:

1. O le ā le uiga o le kerisiano? Fa'asa'o (a) le tali e talafeagai ma lou manatu.

- o lē ofo lona ola mo Keriso
- o le amio lelei
- o le faatuatua i le Atua
- o lē talitonu o Iesu Kerisio o le alo o le Atua
- o se isi _____

2. O ā foliga aliali o le kerisiano?

Fesili 1: Uiga o le Kerisiano

O tali nei a tamaiti o le vasega:

- o lē ofo lona ola mo Keriso = 13
- o le amio lelei = 0
- o le faatuatua i le Atua = 9
- o lē talitonu o Iesu Kerisio o le alo o le Atua = 7
- o se isi _____ = 2

1. Fa'amatala i ni fuai'upu se lua le ata olo'o alia'i mai i tali o i luga.

Fesili 2: O ā uiga aliali o le Kerisiano?

O tali nei sa aumai i pepa fesili.

alofa, fesoasoani, lelei	alofa	toaga i le lotu	lauga
loto fesoasoani	amiotonu	tatalo i taimi uma	amio pulea
amiotonu	amio pulea	amio lelei	talai upu a le Atua
toaga	faatuatua	taliaina Iesu	talai Iesu
iloa le Tusi Paia	talitonu ia Iesu	avea ma faifeau	talai Iesu
amioga	amioga	amio Atua	
filemu	loto alofa		
amio lelei	amiotonu, amio pulea		
	tatalo i taimi uma		

1. Fa'avasega le lisi i ni vaega tetele olo'o aliā'i mai i tali.
2. Fa'aopoopo le aofa'i o vaega ta'itasi. Fa'aliliu i pasene.
3. Fa'aaogā se kalafi e tu'ufa'atasi ai aofa'i o vaega ta'itasi.
4. Fa'amatala ni uiga o aliali mai i le tu'ufa'atasiga.

Fa'atinoga 10

Iloiloga

1. Galulue ta'ito'afā.
2. Fa'atalanoa la'asaga o le sa'ili'iliga ma tomai olo'o aofia i fa'atinoga o la'asaga ta'itasi.
3. Fa'amatala pe na ā lou taumafai i fa'atinoga eseese o le sa'ili'iliga. Fa'amatala ni tulaga e ono fa'aleleia.

